

四庫全書

史部

欽定四庫全書

史部

續後漢書卷七十一上至
二下

詳校官編修臣黃壽齡

編修臣裴謙覆勘

騰錄監生臣董誠

騰錄監生臣楊以澐

騰錄監生臣周謨揚

欽定四庫全書

續後漢書卷七十一上

元 郝經 撰

列傳第六十八上

死唐

魏

邊讓

周不疑

楊修

丁儀

弟廙

崔琰

許攸
妻圭

毛玠

楊俊

鮑勛

父偉

鄭小同

謹案邊讓周不疑傳闕

楊修字德祖太尉彪之子也博學有俊才機辯穎悟建安中舉孝廉除郎中曹操為丞相署倉曹屬主簿時軍國多務修總知內外酬置如流無不稱當自太子丕以

下並結交好臨菑侯植以才捷愛幸委意

謹案陳志作來意文選引

典略作秉意

投修與修書曰數日不見思子為勞想同之也

僕少小好為文章迄今二十有五年矣然今世作者可畧而言也昔仲宣獨步於漢南孔璋鷹揚於河朔偉長擅名於青土公幹振藻於海隅德璉發迹於北魏足下

高視于上京當此之時人人自謂握靈蛇之珠家家自謂挹荆山之玉吾王於是設天網以該之頓八紘以掩之今悉集茲國矣然此數子猶復不能飛騫

謹案陳志作飛翰

絕跡一舉千里也以孔璋之才不閑於辭賦而多自謂能與司馬長卿同風譬畫虎不成反為狗者也前有書嘲之反作論盛道僕贊其文夫鍾期不失聽於今稱之吾亦不能妄歎者畏後世之嗤余也世人作述不能無病僕長好人譏彈其文有不善應時改定昔丁敬禮嘗

作小文使僕潤色之僕自以才不過若人辭不為也敬
禮謂僕卿何所疑難文之佳惡吾自得之後世誰相知
定吾文者耶吾嘗歎此達言以為美談昔尼父之文辭
與人通流至於制春秋游夏之徒乃不能措一辭過此
而言不病者吾未之見也盖有南威之容乃可以論於
淑媛有龍淵之利乃可以議於斷割劉季緒才不能逮
於作者而好詆訶文章倚撫利病昔田巴毀五帝罪三
王咎五霸於稷下一旦而服千人魯連一說使終身杜

口劉生之辯未若田氏今之仲連求之不難可無歎息
乎人各有好尚蘭茝蓀蕙之芳衆人所好而海畔有逐
臭之夫咸池六莖之發衆人所共樂而墨翟有非之之
論豈可同哉今往僕少小所著辭賦一通相與夫街談
巷說必有可采擊轅之歌有應風雅匹夫之思未易輕
棄也辭賦小道固未足以揄揚大義彰示來世也昔揚
子雲先朝執戟之臣耳猶稱壯夫不為也吾雖薄德位
為藩侯猶庶幾戮力上國流惠下民建永世之業流金

石之功豈徒以翰墨為勲績辭賦為君子哉若吾志未
果吾道不行則將采庶官之實錄辯時俗之得失定仁
義之衷成一家之言雖未能藏之於名山將以傳之於
同好非要之皓首豈今日之論乎其言之不慚恃惠子
之知我也明早相迎書不盡懷修荅牋曰不侍數
日若彌年載豈獨愛顧之隆使係仰之情深邪損
辱來命蔚矣其文誦讀反覆雖諷雅頌不復過也
若仲宣之擅江表陳氏之跨冀域徐劉之顯青豫

應生之發魏國斯皆然矣至如修者聽采風聲仰德不

暇自

謹案自與文選合陳志作目

周章於省覽何惶駭於高視哉伏

惟君侯少長貴盛體發旦之質有聖善之教遠近觀者
徒謂能宣昭懿德光贊大業而已不能復兼覽傳記留
思文章今乃含王超陳度越數子觀者駭視而拭目聽
者傾首而聳耳非夫體通性達受之自然其誰能至於此
乎又嘗親見執事握牘持筆有所造作若成誦在心借
書於手曾不斯須少留思慮仲尼日月無得踰焉修之

仰望有如此矣是以對鶚而辭作暑賦彌日而不獻見西施之容歸憎其貌者也伏想執事不知其然猥受顧賜教使刊定春秋之成莫能損益呂氏淮南字值千金然而弟子鉗口市人拱手者聖賢卓犖固所以殊絕凡

庸也

原注史記呂不韋使其客人人著所聞集論以為八覽六論十二紀二十餘萬言以為備天地萬物

古今之事號曰呂氏春秋布咸陽市門縣千金其上延諸侯游士賓客有能增損一字者予千金 桓子新論

淮南王聘天下辯士以著篇章書成皆布之都市縣置千金以延示衆士而莫能有變易者乃其事約豔體具

而言也 今之賦頌古詩之流不更孔公風雅無別爾修家

子雲老不曉事強著一書悔其少作若比仲山周旦之徒則皆有愆乎君侯忘聖賢之顯迹述鄙宗之過言切以為未之思也若乃不忘經國之大美流千載之英聲銘功景鍾書名竹帛此自雅量素所蓄也豈與文章相妨害哉輒受所惠切備矇瞍誦歌而已敢忘惠施以忝莊氏季緒瑣瑣何足以云操平漢中欲遂攻昭烈而不得進欲守之又難護軍不知進止操出教惟曰雞肋而已外曹莫能曉修獨曰夫雞肋食之則無所得棄之

則如可惜公歸決矣乃令外白稍嚴操於是回師初邯鄲淳作孝女曹娥碑蔡邕題八字曰黃絹幼婦外孫齋白謂修曰勿言待吾思之行三十里令修言其義修曰黃絹色絲絕字幼婦少女妙字外孫女子好字齋白受辛辭字操曰一如吾意有智無智校三十里操素忌修於是積前後事深銜修及操欲立世子修與丁儀丁廙稱臨菑侯植之才勸操立之崔琰賈翊等諫乃止五官將丕患之以車載廢簏內朝歌長吳質與之謀修以白操

操未及推驗不懼告質質曰無害也明日復以簏載絹以入修復白之推驗無人操由是疑焉其後植以驕縱見疎而植故連綴修不止修以不敢自絕每當就植慮事有關忖度操意豫作答教十餘教門下教出隨所問答之於是教裁出答已入如是者三操怪其捷廉之知狀操又以修素術之甥惡之乃以修前後漏泄言教交關諸侯殺之修臨死謂人曰我固知死之晚其意以為坐植也修死百餘日而操卒不立黜植而殺其黨丁儀

丁廙使操不殺修丕亦殺之矣修所著賦頌碑讚詩哀

辭表記書凡十五篇修子囂囂子準皆知名晉世

原注劉歆

曰按楊氏有兩族赤泉氏從木子雲自叙其受氏從才而楊修稱家子雲又似震族亦是楊氏不知文士聊如此云其亦實然也今書中華陰之族從木從才相半未知所從學者辯之

丁儀字正禮沛國人也父冲宿與曹操親善從車駕東還與曹操書曰足下常有匡佐之志今其時矣時張楊適還河內操得書乃引軍迎天子東詣許以冲為司隸校尉與諸將飲酒醉爛腸死操常德冲聞其子儀為令

士欲以愛女妻之以問五官將丕曰女子觀貌而正禮目不便女必不悅不如與伏波子楸操從之尋辟儀為掾與論議嘉其才曰丁掾好士也即使其兩目盲尚當與女何況但眇耶吾兒誤我時儀亦恨不得尚公主而與臨菑侯植親善數稱其才操既欲立植而儀又贊之逼大臣正議遂已及丕立欲治儀罪轉為右刺姦掾欲儀自裁而儀不能乃對中領軍夏侯尚叩頭求哀尚為流涕而不能救後因事收付獄殺之廋字敬禮有才

學初辟公府建安中為黃門侍郎虞常從容謂操曰臨
菑侯天性仁孝發於自然而聰明特達博學淵識文章
絕倫天下賢士君子皆願從遊而為之死實天所以鍾
福於大魏而永授無窮之祚也以勸動操操曰植吾愛
之安能若卿言吾欲立之為嗣何如虞曰此國家之所
以興衰天下之所以存亡非愚劣所敢與及虞聞知臣
莫若君知子莫若父至於君不論明闇父不問賢愚而
能常知其臣子者何蓋相知非一事一物相親非一旦

一夕也況明公加之聖哲發命吐言可謂上應天命下合人心得之於須臾垂之於萬世者也庶不避斧鉞之誅敢不盡言操深納之及丕立并其男口皆殺之

謹案目錄此下有崔琰傳今闕止存許攸婁圭

二篇

許攸字子遠少與袁紹及曹操善初平中隨紹在冀州嘗為謀議官渡之役諫紹勿與操相攻紹自以彊盛必欲極其兵勢又屢獻計策不用俄而其家犯法欲收攸

欽定四庫全書

續後漢書
卷七十一上

攸乃亡詣操進計攻紹紹破走及得冀州攸有功焉攸
自恃勲舊時與操相戲每在席不自限齊至呼操小字
曰某甲卿非我不得冀州也操笑曰汝言是也然內嫌
之其後出行從鄴東門顧謂左右曰此家非得我則不
得出此門也有人白者遂收殺之妻圭字子伯少與曹
操有舊圭有大志常歎曰男兒居世會當得數萬兵千
匹騎著後爾儕輩笑之後坐臧亡命被繫當死踰獄出
捕者追之圭乃變服如助捕者吏不能覺得免會義兵

起圭亦會衆於荊州北界與劉表相依後歸操操以為
大將軍不典兵與議軍國大計劉表卒操向荊州表子
琮降以節迎操諸將皆疑詐操以問圭圭曰天下擾攘
各貪王命以自重今以節來是必至誠操以為然遂進
兵入荊州甚被寵秩家累千金操曰婁子伯富樂於孤但勢
不如爾從破馬超等圭功為多操歎曰子伯之計孤不
及也後操從諸子出遊圭與南郡習授同載授曰父子
如此何其快也圭曰居世間當自為之而觀他人乎授

乃白之遂見誅

毛玠字孝先陳留平丘人也少為縣吏以清公稱將避

亂荊州未至聞劉表政令不明遂往魯陽

謹案陳志作
住魯陽通志

作往與
此合

曹操臨兗州辟為治中從事玠語操曰今天下

分崩國主遷移生民廢業饑饉流亡公家無經歲之儲
百姓無安固之志難以持久袁紹劉表雖士民衆彊皆
無經遠之慮未有樹基建本者也夫兵義者勝守位以
財宜奉天子以令不臣修耕植以蓄軍資如此則霸王

之業可成也操敬納其言轉幕府功曹操為司空丞相
玠嘗為東曹掾與崔琰並典選舉其所舉用皆清正之
士雖於時有盛名而行不由本者終莫得進務以儉率
人由是天下之士莫不以廉節自勵雖貴寵之臣與服
不敢過度操歎曰用人如此使天下人自治吾復何為
哉曹丕為五官將自詣玠屬所親玠荅曰老臣以能守
職幸得免戾今所說人非遷次不敢奉命大軍還鄴議
所并省玠請謁不行時人憚之咸欲省東曹乃共白曰

舊西曹為上東曹為次宜省東操知其情令曰日出於東月盛於東凡人言方亦復先東何以省東曹遂省西曹初操平柳城班所獲器物特以素屏風素憑几賜玠曰君有古人之風故賜君古人之服玠居顯位常布衣蔬食撫育孤兄子甚篤賞賜振施貧族家無所餘遷右軍師魏國初建為尚書僕射復典選舉玠雅亮公方在官清恪拔貞實斥華偽進遜行抑阿黨諸宰守治民功績不著而私貯豐足者皆免黜停廢久不選用於時四

海翕然莫不勵行至乃長吏還者垢面羸衣常乘柴車
軍吏入府朝服徒行人擬壺飡之潔家象濯纓之操貴
者無穢欲之累賤者絕姦貨之求吏潔於上俗移乎
下時太子未定而臨菑侯植有寵玠密諫曰近者素紹
以嫡庶不分覆宗滅國廢立大事非所宜聞後羣僚會
玠起更衣操目指曰此古所謂國之司直我之周昌也
原注漢書周昌為人彊力敢直言高帝欲廢太子而立
戚姬子如意為太子昌廷爭之彊上問其說昌為人吃
又盛怒曰臣不能言心知其不可
陛下欲廢太子臣期期不奉詔
崔琰既死玠內不悅

後有白玠者出見黥面反者其妻子沒為官奴婢玠言
曰使天不雨者蓋此也操大怒收玠付獄大理鍾繇詰
玠曰自古聖帝明王罪及妻子書云左不共左右不共
右予則孥戮女司寇之職男子入於罪隸女子入於舂
槁漢律罪人妻子沒為奴婢黥面漢法所行黥墨之刑
存於古典今真奴婢祖先有罪雖歷百世猶有黥面供
官一以寬良民之命二以宥并罪之辜此何以負於神
明之意而當致旱按典謀急恒寒若舒恒燠若寬則亢

陽所以為旱玠之吐言以為寬耶以為急也急當陰霖
何以反旱成湯聖世野無生草周宣令主旱魃為虐亢
旱以來積三十年歸咎黥面為相值不衛人伐邢師興
而雨

原注左氏傳衛人伐邢以報芟圃之役於是衛大旱卜有事於山川不吉甯莊子曰昔周饑克殷而

年豐今邢方無道諸侯無伯天其或者欲使衛討邢乎從之師興而雨罪惡無徵何以應

天玠譏謗之言流於下民不悅之聲上聞聖聽玠之吐
言勢不獨語時見黥面凡為幾人黥面奴婢所識知耶
何緣得見對之歎言時以語誰見答云何以何日月於

何處所事已發露不得隱欺其以狀對玠曰臣聞蕭生

飲藥困於石顯

原注漢書弘恭石顯久典樞機蕭望之以為中書政本宜以賢明之選自武帝

遊宴後庭故用宦者非國舊制又違古不近刑人之議白欲更置士人繇是大與恭顯忤於是奏望之朋黨詔

置廷尉望之子散騎中郎乃上書訟之恭顯知望之素高節不絀辱建白望之不悔過服罪教子上書歸非於

上發執金吾車騎圍其第望之飲鴆自殺陳志作蕭生縊死誤故更飲藥

賈子放外讒在

絳灌白起賜劒於杜郵晁錯致誅於東市伍員絕命於

吳都斯數子者或妬其前或害其後臣垂齟執簡累勤

取官職在機近人事所竄屬臣以私無勢不絕語臣以

冤無細不理人情淫利為法所禁法禁於利勢能害之

青蠅橫生為臣作謗謗臣之人勢不在他昔王叔陳生

爭正王廷宣子平理命舉其契

原注左氏傳王叔陳生與伯與爭政王右伯與

王叔陳生怒而出奔及河王復之殺史狡以說焉不入

遂處之晉侯使士匄平王室王叔與伯與訟焉王叔之

宰與伯與之大夫瑕禽坐獄於王庭士匄聽之曰天子

所右寡君亦右之所左亦左之使王叔氏與伯與合要

契王叔不能舉其是非有宜曲直有所春秋嘉焉是以書

之臣不言此無有時人說臣此言必有徵要乞蒙宣子

之辯而求王叔之對若臣以曲聞即刑之日方之安焉

之贈賜劔之來比之重賞之惠謹以狀對時桓階和洽

進言救玠玠遂免黜卒于家

原注孫盛曰魏武於是失政刑矣易稱明折庶獄傳

有舉直錯枉庶獄明則國無怨民枉直當則明無不服未有徵青蠅之浮聲信浸潤之譖訴可以允釐四海

惟清緝熙者也昔者漢高獄蕭何出復相之玠之一責永見擯故二主量度豈不殊哉

操賜棺器

錢帛拜子機郎中

謹案目錄此下有楊俊傳今闕

鮑勛字叔業泰山平陽人漢司隸校尉鮑宣九世孫也

宣後有從上黨徙泰山者遂家焉勛祖丹官至少府侍

中父信寬厚愛人沈毅有志節靈帝時為騎都尉大將
軍何進遣東募兵得千餘人還到城臯而進已遇害信
至京師董卓亦始到信知卓必為亂勸袁紹襲卓紹畏
卓不敢發信乃引軍還鄉里收兵二萬騎七百輜重五
千餘乘是歲曹操亦起兵於己吾信與弟韜以兵應操
操與袁紹表信行破虜將軍韜裨將軍時紹衆最盛豪
傑多向之信獨謂操曰夫畧不世出能總英雄以撥亂
反正者君也苟非其人雖強必斃君殆天之所啓遂深

自結納操亦親異焉汴水之敗信被創韜在陳戰亡紹
劫奪韓馥位遂據冀州信言于操曰奸臣乘釁蕩覆王
室英雄奮節天下響應者義也今紹為盟主因權專利
將自生亂是復有一卓也若抑之則力不能制祇以構
難又何能濟且可規大河之南以待其變操善之操為
東郡太守表信為濟北相會黃巾大眾入州界兗州刺
史劉岱欲與戰信諫曰今賊衆百萬百姓皆震恐士卒
無鬪志不可敵也然賊軍無輜重惟以鈔畧為資今不

若畜士衆之力先為固守彼欲戰不得攻又不能其勢
必離散然後選精銳據要害擊之可破也岱不從遂與
戰果為所殺操以賊恃勝而驕欲設奇兵挑擊之于壽
張先與信出行戰地而卒與賊遇信殊死戰以救操得
潰圍出信遂戰沒時年四十一信雖遭亂起兵家本儒
素治身至儉而厚養將士居無餘財士以此歸之操購
求其喪不得乃刻木如信狀祭而哭焉二子劬勛勛清
白有高節劬有父風建安十七年操追錄信功表封勛

兄劭新都亭侯

原注魏書劭有父風太祖嘉之加拜騎都尉使持節劭薨子融嗣

辟勛

丞相掾

原注魏書勛清白有高節知名于世

二十二年立子丕為太子以

勛為中庶子徙黃門侍郎出為魏郡西部都尉丕郭夫人弟為曲周縣吏斷盜官布法應棄市操時在譙丕留鄴數手書為之請罪勛不敢擅縱具列上勛前在東宮守正不撓丕固不悅及此志望滋甚會郡界休兵有失期者密敕中尉奏免勛官久之拜侍御史延康元年操卒丕立勛以駙馬都尉兼侍中不篡代勛每陳今之所

急惟在軍農寬惠百姓臺榭苑囿宜以為後丕將出獵
勛停車上疏曰臣聞五帝三王靡不明本立教以孝治
天下陛下仁聖惻隱有同古烈臣冀當繼蹤前代令萬世
可則也如何在諒闇之中修馳騁之事乎臣冒死以聞
惟陛下察焉丕手毀其表而競行獵中道頓息問侍臣
曰獵之為樂何如八音也侍中劉曄對曰獵勝于樂勛
抗辭曰夫樂上通神明下和人理隆治致化萬邦咸乂
故移風易俗莫善於樂况獵暴華盖于原野傷生育之

至理櫛風沐雨不以時隙哉昔魯隱觀魚于棠春秋譏之雖陛下以為務愚臣所不願因奏劉晔佞諛不忠阿順陛下過戲之言昔梁丘據取媚於造臺晁之謂也

原注

左氏傳齊侯至自田晏子侍于造臺子猶馳而造焉公曰惟據與我和夫晏子對曰據亦同也焉得為和公曰和與同異乎對曰異和如羹焉水火醯醢鹽梅以烹魚肉燂之以薪宰夫和之齊之以味濟其不及以洩其過君子食之以平其心君臣亦然君所謂可而有否焉臣獻其否以成其可君所謂否而有可焉臣獻其可以去其否是以政平而不至于民無爭心今據不然君所謂可據亦曰可君所謂否據亦曰否若以水濟水孰能食之若琴瑟之專一誰能聽請有司議罪以清皇朝不怒作之同之不可也如是

色罷還即出勛為右中郎將黃初四年尚書令陳羣僕射司馬懿並舉勛為宮正宮正即御史中丞也帝不得已而用之百僚嚴憚罔不肅然六年秋丕欲伐吳羣臣大議勛面諫曰王師屢征而未有所克者蓋以吳蜀唇齒相依憑阻山水有難拔之勢故也往年龍舟飄蕩隔在南岸聖躬蹈危臣下破膽此時宗廟幾至傾覆為百世之戒今又勞兵襲遠日費千金中國虛耗令黠虜玩威臣切以為不可丕益忿之左遷勛為治書執法丕從壽

春還屯陳留郡界太守孫邕見出過勛時營壘未成但立標埒邕邪行不從正道軍營令史劉曜欲推之勛以塹壘未成解止不舉軍還雒陽曜有罪勛奏絀遣而曜密表勛和解邕事詔曰勛指鹿作馬收付廷尉廷尉法議正刑五歲三官駁依律罰金二斤丕大怒曰勛無活分而汝等敢縱之收三官已下付刺姦當令十鼠同穴太尉鍾繇司徒華歆鎮軍大將軍陳羣侍中辛毘尚書衛臻守廷尉高柔並表勛父信有功于太祖求請勛罪丕

不許遂誅勛勛內行既修廉而能施死之日家無餘財
後二旬丕亦卒莫不為勛歎恨

謹案此卷鮑勛以上諸人議俱闕

鄭小同漢大司農玄之孫也父益恩北海太守孔融舉
孝廉黃巾圍融死之小同其遺腹子也丁卯日生而玄

以丁卯歲生有文在其手曰玄

謹案後漢書鄭玄傳云玄以其手文似已

故

名曰小同取春秋子同生之義也

原注左氏傳桓公六年子同生公曰是其

生也與吾同物命之曰同

及長盡傳玄學為鉅儒教授鄉里曹丕徵

為郎中稱疾不起曹叡立太尉華歆表曰臣聞勵俗宣

化莫先於表善班祿敘爵莫美於顯能是以楚人思子

文之治復命其肩漢室嘉江公之德用顯其世

原注左氏傳楚

滅若敖氏其孫歲尹克黃使於齊還及宋聞其亂其人

曰不可以入矣歲尹曰棄君之命獨誰受之君天也天

可逃乎遂歸復命而自拘於司敗王思子文之治國也

曰子文無後何以勸善使復其所改命曰生漢書瑕

丘江公受穀梁春秋及詩於魯申公傳子至孫為博士

宣帝即位聞衛太子好穀梁春秋徵江公孫為博士

伏見故漢司農北海鄭玄當時之學名冠華夏為世儒宗

文皇帝旌錄先賢拜玄適孫小同以為郎中長假在家

小同年踰三十少有令質學綜六經行著鄉邑海岱之人莫不嘉其自然美其器量亦其所履有質直不渝之性然而恪恭靜默色養其親不治可見之美不競人間之名斯誠清時所宜式敘前後明詔所斟酌而求也臣老病委頓無益視聽謹具以聞於是徵為侍中賜爵關内侯甘露中曹髦行養老禮詔以王祥為三老小同為五更後以事詣司馬昭昭有密疏未之屏也如廁還謂小同曰卿見吾疏乎對曰弗見也昭曰寧我負卿無卿負

我遂鴆殺之

議曰小同以碩儒重德若介然知止則果同夫祖矣方盜憎主人乃珥貂佩劔備顧問管喉舌位通侯巋然為國老觸忤險幾不得其死視康成之雍容進退不污素董卒全其高而考其終則大不同矣初曹操殺呂伯奢家八人曰寧我負人無人負我及昭之害小同乃曰寧我負卿無卿負我陰賊狠忍知有一我不復有天地人物賊臣篡子用心皆出一律其亦不仁甚矣唐陸贄曰

曰無我負人寧人負我克己自反休休有容易曹馬為
顏閔特一念反覆之間爾夫子之道忠恕而已大哉曾
子之言

欽定四庫全書

續後漢書卷七十一下

元 郝經 撰

列傳第六十八下

死虐

吳

高岱 于吉 盛憲 沈友 張休 吾粲

朱據 王蕃 樓玄 賀邵 子循 韋曜

華覈 邵疇 張尚

高岱字孔文吳郡人也性聰達輕財貴義甄英拔奇取
於未顯所友八人者皆一世之傑太守盛憲以為上計
舉孝廉許貢來領郡欲害憲岱將憲避難於許昭家求
救於陶謙謙未即救岱憔悴泣血水漿不入口謙感其
忠壯許為出軍以書與貢岱得謙書還而貢已囚其母
吳人皆危懼謂往必見害岱曰在君則為君且母在牢
獄義當必往若得見事自當解遂詣貢通書貢即與相
見岱才辭敏捷屈為陳謝貢遽出其母岱語友人張允

沈晦

原注音是

令豫具船謂貢必悔當復來追出便將母乘

船易道而逃貢果遣人追之令追者若及於船便殺之

已過江則止其人與岱錯道遂免乃隱於餘姚孫策定

會稽使會稽丞陸昭逆之策虛已候焉聞其善左氏春

秋欲從講讀或謂策曰高岱以將軍但英武而已素無

文學若與論傳而云不知者則某言符矣又謂岱曰孫

將軍為人惡勝已者若問當言不知乃合意爾如遂辯

議則必危殆岱以為然及與論傳輒云不知策果怒以

為輕已乃囚之其親友及州人皆露坐為請策登樓望見數里中填滿惡其得衆遂殺之時年三十餘

謹案目錄此下有于吉傳今闕

盛憲字孝章會稽人也品量雅偉舉孝廉補尚書郎稍遷吳郡太守許貢代之因還會稽孫策平定吳會誅其英豪憲素有高名策深忌之未及害憲而卒孫權統業尤惡憲初憲與少府孔融善融憂其不免乃與曹操書曰歲月不居時節如流五十之年忽焉已至公為始滿

融又過二海內知識零落殆盡惟有會稽盛孝章尚存
其人困於孫氏妻孥湮沒單子獨立孤危愁苦若使憂
能傷人此子不得永年矣春秋傳曰諸侯有相滅亡者
桓公不能救則桓公恥之

原注公羊傳邢亡孰亡之蓋狄滅也曷為不言蓋狄滅之

為桓公諱也曷為為桓公諱上無天子下無方伯諸侯有相滅亡者桓公不能救則桓公恥之今孝章

實丈夫之雄也天下談士依以揚聲而身不免於幽繫
命不期於旦夕吾祖不當復論損益之友而朱穆所以
絕交也公誠能馳一介之使加咫尺之書則孝章可致

反道可弘矣今之少年善謗前輩或能譏評孝章要為天下大名九牧之人所共稱歎燕君市駿馬之骨非欲

以騁道里乃當以招絕足也

原注戰國策郭隗謂燕昭王曰臣聞古之人君有市

千里馬者三年而不得於是遣使者賣千金之貨將市於他國未至而千里之馬已死使者以五百金買死馬

之骨以歸其君大怒曰所求者本不市死馬何故捐金市死馬乎將誅之使者對曰死者尚市之況生者乎天

下必知吾君之好也馬將至矣惟公匡復漢室宗社將於是期年而千里馬至者三馬

絕又能正之正之之術實須得賢珠玉無脛而自至者

以人好之也況賢者之有足乎

原注韓詩外傳蓋胥謂晉平公曰珠出於海玉

出於山無足而至者好之也昭王築臺以尊郭隗隗雖
士有足而不至者君不好也

小才而逢大遇竟能發明主之至心故樂毅自魏往劇
辛自趙往鄒衍自齊往向使郭隗倒懸而不解臨難而
王不拯則士亦將高翔遠引莫有北首燕路者矣凡所
稱引自公所知而復有云者欲公崇篤斯義因表不悉
由是徵為騎都尉制命未至果為權所害子匡奔魏位
至征東司馬

沈友字子正吳郡人也年十一華歆行覽風俗見而異

之因呼曰沈郎可登車語乎友邊巡却曰君子講好會
宴以禮今仁義陵遲聖道崩壞先生銜命將以弘闡教
化整齊風俗而輕脫威儀猶負薪救火無乃更崇其熾
乎歆慙曰自桓靈以來雖多英彥未有幼童若此者弱
冠博學無不貫綜善屬文仍喜武事注孫子兵法又辯
給所至人皆默然莫與為對咸稱其筆舌刀為三妙原注
蘇州志辯於口時稱其筆舌權以禮聘之既至論王霸
與刀三者皆妙過絕於人之略當時之務因陳宜并取荊州權納之正色危言風

采峻厲大迂庸臣遂誣以謀反權亦忌其英邁謂終不

為已用

原注蘇州志正色立朝為庸臣所譖權亦疑其不為已害之

一日大會羣僚

友有所是非權令人扶出謂曰人言卿反友知不免乃

曰主上在許有無君之心者可謂非反乎遂殺之年二

十九

張休字叔嗣輔吳將軍昭次子也弱冠與諸葛恪顧譚

等俱為太子登僚友以漢書授登休為人解達指摘文

義分別事物並有條章登甚敬之從中庶子轉為右弼

都尉權嘗遊獵迨暮乃歸休上疏諫戒權大善之以示
昭及登卒後為侍中拜羽林都督平三典軍事遷揚武
將軍為魯王霸友黨所譖與顧譚承俱以為陂論功事
休承與典軍陳恂通情詐增其伐並徙交州中書令孫
弘佞偽險詖原注吳錄弘會稽人休素所忿弘因是譖訴下詔賜
休死時年四十一

謹案目錄此下有吾粲朱據傳今闕

議曰策翻蜚江表民未見德而惟戮是聞謂吉惑眾則

猶有辭岱何為哉斃于貢客而鏡中見吉鬼誅之也孫
權有偏霸之略統馭之術惜乎無君人之度也張昭顧
命遺老至使士門終於散地虞翻以觸忤擯陸績以直
道黜終身不復客死南徼盛憲沈友一時名流猜阻不
釋而竟誅之張休吾粲朱據皆以忠諫蔽於讒慝獲罪
隕身睚眦險狠無以異操士生茲時不能高飛遠舉而
蹈其禍何不幸歟

王蕃字永元廬江人也博覽多聞兼通術藝始為尚書

郎去官孫休即位與賀邵薛瑩虞汜俱為散騎中常侍
皆加駙馬都尉時論清之遣使至漢漢人稱焉還為夏
口監軍孫皓立復入為常侍與萬彧同官或與皓有舊

俗士挾侵謂蕃自輕

謹案俗士二句通志作挾主
自尊謂蕃輕已語較明晰

又中

書丞陳聲皓之嬖臣數譖毀蕃蕃體氣高亮不能承顏
順指時或迂意積以見責甘露二年丁忠使晉還皓大
會羣臣蕃沉醉頓伏皓疑而不悅舉蕃出外頃之請還
酒亦不解蕃性有威嚴行止自若皓大怒呵左右於殿

下斬之衛將軍滕牧征西將軍留平請不能得皓

出登來山使親近將擲蕃首作虎跳狼爭咋齧之

首皆碎壞

原注江表傳皓用巫史之言謂建業宮不利乃西巡武昌仍有還都之意恐羣臣不從乃

大請會賜將吏問蕃射不主皮為力不同科其義云何蕃思惟未荅即於殿上斬蕃出登來山使親近將跳蕃

首作虎跳狼爭咋齧之頭皆碎壞欲以示威使衆不敢犯也此與本傳不同吳錄皓每於會因酒酣輒令侍臣

嘲謔公卿以為笑樂萬或既為左丞相蕃嘲或曰魚潛於淵出水吮沫何則物有本性不可橫處非分也或出

自溪谷羊質虎皮虛受光赫之寵跨越三九之位犬馬猶能識養將何以報厚施乎或曰唐虞之朝無謬舉之

才造父之門無駑蹇之質蕃上誣明還下訕楨幹亦何傷於日月適見其不知量爾裴松之曰按本傳云丁忠

使晉還皓為大會於會中殺蕃檢忠從北還在此年之
春或時尚未為丞相至秋乃為相爾吳錄所言為乖互
同丞相陸凱上疏曰常侍王蕃黃中通理知天知物處
朝忠蹇斯社稷之重鎮大吳之龍逢也昔事景皇納言
左右景皇欽嘉歎為異倫而陛下忽其苦辭惡其直對
梟之殿堂尸骸暴棄邦內傷心有識悲悼其痛蕃如此
蕃死時年三十九皓徙蕃家屬廣州二弟著延皆佳士
郭馬起事不為馬用見害

謹案目錄此下有樓玄賀邵韋曜傳今闕

華覈字永先吳郡武進人也始為上虞尉典農都尉以

文學入為祕府郎遷中書丞漢為魏所并覈詣宮門發

表曰間聞賊衆蟻聚西境西境艱險

謹案陳志作報險誤

謂當無

虞定聞陸抗表至成都守臣主播越社稷傾覆昔衛

為狄所滅而桓公存之

原注左氏傳狄人伐衛懿公及狄人戰于榮澤衛師敗績遂滅

衛立戴公以廬于曹齊侯使公子無虧帥車三百乘甲士三千人以戌曹僖之元年齊桓公遷邢于夷儀二年

封衛于楚丘邢遷如歸衛國志亡

今道里長遠不可救振失委附之士

棄貢獻之國臣以草芥竊懷不寧陛下聖仁恩澤遠撫

卒聞如此必垂哀悼臣不勝忡悵之情謹拜表以聞孫
皓即位封徐陵亭侯寶鼎二年皓更營新宮制度弘廣
飾以金玉所費甚多是時盛夏興工農守並廢霰上疏
諫曰臣聞漢文之世九州晏然秦民喜去慘毒之苛政
歸劉氏之寬仁省役約法與之更始分王子弟以藩漢
室當此之時皆以為泰山之安無窮之基也至於賈誼
獨以為可痛哭及流涕者三可為長歎息者六乃曰當
今之勢何異抱火於積薪之下而寢其上火未及然而

謂之安其後變亂皆如其言臣雖下愚不識大倫竊以
曩時之事揆今之勢誼云復數年間諸王方剛漢之傳
相稱疾罷歸欲以此為治雖堯舜不能安今大敵據九
州之地有大半之衆習攻戰之餘術乘戎馬之舊勢欲
與中國爭相吞之計其猶楚漢勢不兩立非徒漢之諸
王淮南濟北而已誼之所欲痛哭比今為緩抱火卧薪
之喻於今而急大皇帝覽前代之如彼察今勢之如此
故廣開農桑之業績不訾之儲恤民重役務養戰士是

以大小感恩各思竭命期運未至早棄萬國自是之後
疆臣專政上詭天時下違衆議忘安存之本邀一時之
利數興軍旅傾竭府藏兵勞民困無時獲安今之存者
乃創夷之遺衆哀苦之餘民爾遂使軍資空匱倉廩不
實布帛之賜寒暑不周重以失業家戶不贍而北積穀
養民專心東向無復他警蜀為西藩土地險固加承前
主統御之術謂其守御足以長久不圖一朝奄至傾覆
唇亡齒寒古人所懼交州諸郡國之南土交趾九真二

郡已沒日南孤危存亡難保合浦以北民皆搖動因連
避役多有離畔而備戍減少威鎮轉輕常恐呼吸復有
變故昔海虜窺窬東縣多得離民地習海行狃於往年
鈔盜無日今胷背有嫌首尾多難乃國朝之厄會也誠
宜住建立之役先備豫之計勉墾殖之業為饑乏之救
惟恐農時將過東作向晚有事之日整嚴未辦若舍此
急盡力功作卒有風塵之變當委版築之役應烽燧之
急驅怨苦之衆赴白刃之難此乃大敵所因為資也如

但固守曠日持久則軍糧必乏不待接办而戰士已困
矣昔太戊之時桑穀生庭懼而修德怪消殷興熒惑守
心宋以為灾景公下從瞽史之言而熒惑退舍景公延
年夫修德於身而感異類言發於口而通神明臣以愚
蔽誤忝近署不能翼宣仁澤以感靈祇仰慙俯愧無所
投處退伏思惟熒惑桑穀之異天示二主至於他餘錙
介之妖近是門庭小神所為驗之天地無有他變而微
祥符瑞前後屢臻明珠既覲白雀繼見萬億之祚實靈

所擬以九域為宅天下為家不與編戶之民轉徙同也
又今之宮室先帝所營卜土立基非為不祥又揚市土
地與宮相接若大功畢竟與駕遷往門行之神皆當轉
移猶恐長久未必勝舊屢遷不可留則有嫌此乃愚臣
所以夙夜為憂灼也臣省月令季夏之月不可以興土
功不可以會諸侯不可以起兵動衆舉大事必有大殃
今雖諸侯不會諸侯之軍與會無異六月戊巳土行正
王既不可犯加又農月時不可失昔魯隱公夏城中丘

春秋書之垂為後戒今築宮為長世之洪基而犯天地之大禁襲春秋之所書廢敬授之上務臣以愚管竊所未安又恐所召離民或有不至討之則廢役興事不討則日月滋慢若悉並到大衆聚會希無疾病且人心安則念善苦則怨叛江南精兵北土所難欲以十卒當東一人天下未定深可憂惜之如此宮成死叛五千則北軍之衆更增五萬若到萬人則倍益十萬病者有死亡之損叛者傳不善之語此乃大敵所歡喜也今當角力

中原以定彊弱正於際會彼益我損加以勞困此乃雄
夫智士所以深憂臣聞先王治國無三年之儲曰國非
其國安寧之世戒備如此況敵彊大而忽農忘畜今雖
頗種植間者大水沉沒其餘存者當須耘穫而長吏怖
期上方諸郡身涉山林盡力伐材廢農棄務士民妻孥
羸小墾殖又薄若有水旱則永無所獲州郡見米當待
有事冗食之衆仰官供濟若上下空乏運漕不供而北
敵犯疆使周召更生良平復出不能為陛下計明矣臣

聞君明者臣忠主聖者臣直是以懷懷昧犯天威乞垂
哀省書奏皓不納後遷東觀令領右國史覈上疏辭讓
皓答曰得表以東觀儒林之府當講校文義處定疑難
漢時皆名學碩儒乃任其職乞更選英賢聞之以卿研
精墳典博覽多聞可謂悅禮樂敦詩書者也當飛翰騁
藻光贊時事以越揚班張蔡之疇恠乃謙光厚自菲薄
宜勉修所職以邁先賢勿復紛紛時倉廩無儲世俗滋
侈覈上疏曰今寇虜充斥征伐未已居無積年之儲出

無應敵之畜此乃有國者所宜深憂也夫財穀所生當
出於民趨時務農國之上急而都下諸官所掌別異各
自下調不計民力輒與近期長吏畏罪晝夜催民委舍
佃事遑赴會日定送到都或蘊積不用而徒使百姓消
力失時到秋收月督其限入奪其播殖之時而責其今
年之稅如有逋懸則籍沒財物故家戶貧困衣食不足
宜暫息衆役專心農桑古人稱一夫不耕或受其飢一
女不織或受其寒是以先王治國惟農是務軍興以來

已向百載農人廢南畝之務女工停機杼之業推此揆之則蔬食而長飢薄衣而履冰者固不少矣臣聞主之所求於民者二民之所望於主者三二謂求其為已勞也求其為已死也三謂飢者能食之勞者能息之有功者能賞之民以致其二事而主失其三望者則怨生而功不建今帑藏不實民勞役猥主之二求已備民之三望未報且飢者不待美饌而後飽寒者不俟狐貉而後溫為味

謹案通志作滋味

者口之奇文繡者身之飾也今事多

而役繁民貧而俗奢百工作無用之器婦人為綺靡之飾不勤麻枲並繡文黼黻轉相倣效恥獨無有兵民之家猶復逐俗內無儋石之儲而出有綾綺之服至於富賈商販之家重以金銀奢恣尤甚天下未平百姓不贍宜一生民之原豐穀帛之業而棄功於浮華之巧妨日於侈靡之事上無尊卑等級之差下有耗財費力之損今吏士之家少無子女多者三四少者一二通令戶有一女十萬家則十萬人人績織一歲一束則十萬束矣

使四疆之內同心戮力數年之間布帛必積恣民五色
惟所服用但禁綺繡無益之飾且美貌者不待華采以
崇好豔姿者不待文綺以致愛五采之飾足以麗矣若
極粉黛窮盛服未必無醜婦廢華采去文繡未必無美
人也若實如論有之無益廢之無損者何愛而不暫禁
以充府藏之急乎此救乏之上務富國之本業也使管
晏復生無以易此漢之文景承平繼統天下以定四方
無虞猶以彫文之妨農事錦繡之害女工開富國之利

杜飢寒之本況今六合分乖豺狼充路兵不離疆甲不
解帶而可以不廣生財之原充府藏之積哉皓以數年老
敕令草表覈不敢又勅作草文停立待之覈為文曰咨
覈小臣草芥凡庸遭眷值聖受恩特隆越從朽壤蟬蛻
朝中熙光紫闥青璫是憑慈挹清露沐浴凱風效無絲
毫負闕山崇滋潤含垢恩貸累重穢質被榮局命得融
欲報罔極委之皇宮聖恩雨注哀棄其尤猥命草對潤
被下愚不敢違敕懼速罪誅冒承詔命魂逝形留覈前

後陳便宜及貢薦良能解釋罪過書百餘上皆有補益
天冊元年以微譴免數歲卒覈所論事章疏咸傳於世
邵疇字溫伯會稽人也敦尚氣節不為詭隨太守郭誕
辟為功曹鳳皇三年會稽妖言章安侯奮當為天子臨
海太守奚熙與誕書非論國政誕白熙書不白妖言下
郡收誕誕惶恐無以自明疇進曰疇今自在明府何憂
遂詣吏自列云不白妖言事由於已非府君罪吏上疇
辭皓怒甚疇慮誕卒不免遂自殺以證之臨亡置辭曰

疇生長邊陲不閑教道得以門資廁身本郡踰越儕類
位極朝右不能贊揚盛化養之以福今妖訛橫興干國
亂紀疇以嚆噓之語本非事實雖家誦人詠不足有累
天下重器而匹夫橫議疾其醜聲不忍聞見欲含垢藏
疾不彰之翰筆鎮躁歸靜使之自息愚心勤勤每執斯
旨故誕屈其所是默以見從此之為愆實由於疇謹不
敢逃死歸罪有司惟乞天鑒特垂清察吏收疇喪得辭
以聞皓乃免誕大刑送付建安作船疇死時年四十皓

嘉疇節義詔郡縣圖形廟堂矣熙初以佞幸於皓為中書郎譖宛陵令賀惠邵弟也遣使者徐粲訊治熙又譖粲顧護不即決斷皓遣使就宛陵斬粲收惠付獄會赦得免

張尚絃之孫玄之子也有俊才孫皓時為侍郎以辯捷見知擢為侍中中書令皓嘗問詩云汎彼柏舟惟柏中舟乎尚對曰詩言檜楫松舟則松亦中舟也又問烏之大者惟鶴小者惟雀乎尚對曰大者有禿鶩小者有鷦

鵠皓性忌勝已而尚談論每出其表深以致恨皓使尚鼓琴尚對曰素不能敕使學之後侍宴之次說琴之精

妙尚因言晉平公使師曠作清角曠言吾君德薄不足

以聽之

原注韓子衛靈公將之晉舍於濮水之上夜半聞鼓琴聲召師涓援琴寫之去之晉見晉平公

平公置酒於施夷之臺酒酣靈公曰有新聲請奏之平公曰可即令師涓坐師曠旁援琴鼓之未終師曠撫而止之曰此亡國之聲也不可聽平公曰此道奚出師曠曰師延所作也與紂為靡靡之樂武王伐紂師延東走自投水之中故聞此聲必以濮水之上先聞此聲者國削平公曰寡人所好者音也願遂聞之師涓鼓而終之平公曰音無此最悲乎師曠曰有平公曰可得聞乎師曠曰君德義薄不可以聽之平公曰寡人所好者音也

願聞之師曠不得已援琴而鼓之一奏之有玄鶴二八集於郎門再奏之延頸而鳴舒翼而舞平公大喜起而為師曠壽反坐問曰音無此最悲乎師曠曰有昔者黃帝以清角大合鬼神今君德義薄不足以聽之聽之將敗平公曰寡人老矣所好者音也願遂聞之師曠不得已援琴而鼓之一奏之有白雲從西北起再奏之有大風至而雨隨之飛廊瓦左右皆奔走平公皓意尚以喻恐懼伏於廊屋之間晉國大旱赤地三年皓意尚以喻已不悅後又問孤飲酒可以方誰尚對曰陛下有百觚之量皓云尚知孔丘之不王而以孤方之因發怒收尚積前後語言皆追以為詰尚書岑昏率公卿已下百餘人詣宮叩頭請尚罪得減死送建安作船尋遣人就誅

之

議曰薛瑩稱王蕃器量綽異弘博多通樓玄清白節操才理條暢賀邵厲志高潔機理清要韋曜篤學好古博覽羣籍有記述之才胡冲以為玄邵蕃一時清妙略無優劣必不得已玄宜在先邵當次之華覈文賦之才有過於曜而典誥不及也陳壽曰予觀覈數獻良規期於自盡庶幾忠臣矣然此數子處無妄之世而有名位彊死其理得免為幸爾

贊曰叔世暴君熹殺崇忍英賢不幸遘此凶閔戾氣孔
愞魏初吳季式觀坤維仁矣漢系

欽定四庫全書

續後漢書卷七十二上

元 郝經 撰

列傳第六十九上

技術

漢

華佗

吳普
樊阿

蒯子訓

左慈

甘始

東郭延年
封君達

王真

郝孟節

李意其

周羣

張裕

杜瓊

何宗

古者數以行道後世為技為術而不本於道故大方不完入於小數盡為異端之私也河出圖宓戲畫之為易

洛出書太禹叙之為範

原注易曰天一地二天三地四天五地六天七地八天九地十

天數五地數五五位相得而各有合天數二十有五地數三十凡天地之數五十有五此所以成變化而行鬼神也此河圖之數也書洪範天乃錫禹洪範九疇彝倫攸叙初一日五行次二曰敬用五事次三曰農用八政次四曰協用五紀次五曰建用皇極次六曰乂用三德次七曰明用稽疑次八曰念用庶徵次九曰嚮用五福威用六極孔安國注曰天與禹洛出書神龜負文而出列於背有數至於九禹遂因而第之以成九數常道所以次叙先儒謂洛書蓋取龜象其數至於黃帝堯戴九履一左三右七二四為肩六八為足

舜迎日推策歷象日月星辰

原注司馬貞索隱封禪書曰黃帝得寶鼎神策下云

於是推策迎日則神策者神著也黃帝得著以推筭歷數於是逆知節氣日辰之來故曰推策迎日也書堯

典乃命羲和歷象日月星辰敬授人時

皆所以述道不以為技也周官馮

相氏掌歲月日時

原注周禮春官馮相氏掌十有二歲十有二月十有二辰十日二十有八

星之位辨其叙事以會天位冬夏致日春秋致月以辨四時之叙

保章氏掌天星

原注以志

日月星辰之變動以觀天下之選辨其吉凶以星土辨九州之地所封域皆有分星以觀其妖祥也

眡侵

掌十輝

原注以觀妖祥辨吉凶一日侵二日象三日鐠四日監五日闇六日瞢七日彌八日叙九日隣

十日大卜掌三兆

原注一曰玉兆二曰瓦兆三曰原兆其經兆之體皆百有二十其頌皆千

有二龜人掌六龜

原注天龜曰靈屬地龜曰絳屬東龜曰果屬西龜曰雷屬南龜曰獵屬北龜曰

若屬各以其方之色與其體辨之

筮人辨九筮

原注掌三易以辨九筮之名一曰連山二曰歸

藏三曰周易九筮之名一曰巫更二曰巫咸三曰巫式四曰巫目五曰巫易六曰巫比七曰巫祠八曰巫參九

曰巫環以辨吉凶

占夢占六夢

原注掌其歲時觀天地之會辨陰陽之氣以日月星辰占六夢

之吉凶一曰正夢二曰噩夢三曰思夢四曰寤夢五曰喜夢六曰懼夢

又如食疾瘍之諸

醫

原注食醫疾醫瘍醫皆天官屬

皆專工職守以事上雖以為技亦未

離乎道也故不敢迂怪以為欺神異以為誑挾弄以為

姦一有不經左道則不免王法之誅戰國之際國程侯

度壞亂墮廢莫不踰繩破檢禱張為幻於是星公歷史
卜相醫巫抑揄揣摩箝錯機構巧發竒中矜眩一世及
秦始皇盡剷先王經制狡獪險譎之徒以術自雄為方
士神仙之說自以為游乎方之外閬苑神仙接乎天帝
抽金繩檢玉策匱秘記於寶府識神經於瑤臺有長生
之方不死之藥荒唐誕妄不可紀極而技盡為術矣

原注

史記封禪書宋毋忌正伯僑充尚羨門子高最後皆燕
人為方僊道形解銷化依於鬼神之事騶衍以陰陽主
運顯於諸侯而燕齊海上之方士傳其術不能通然則
迂怪阿諛苟合之徒自此興而不可勝數也自威宣燕

欽定四庫全書

卷七十二上

昭使人入海求蓬萊方丈瀛洲此三神山者其傳在渤海中
去人不遠患且至則船風引而去蓋嘗有至者諸
僊人及不死之藥皆在焉其物禽獸盡白而黃金銀為
宮闕未至望之如雲及到三神山反居水下臨之風輒
引去終莫能至云

漢興於是有天文

原注漢書藝文志天文者序二十八

宿步五星日月以紀吉凶之象聖王所以參政也易曰
觀乎天文以察時變然星事死悍非湛密者弗能由也
夫觀景以譴形非明王亦不能服聽也以不有陰陽
能由之臣諫不能聽之主此所以兩有患也
漢書九流有陰陽家者流蓋出於羲和之官及拘
者為之牽於禁忌泥於小數舍人事而任鬼神
有歷
譜原注歷譜者序四時之位正分至之節會日月五星
之辰以考寒暑殺生之實故聖王必正歷數以定三
統服色之制又以探知五星日月之會凶阨之患吉
隆之喜其術皆出焉此聖人知命之術也非天下之至材

其孰與焉道之亂也患出於小人而強欲知天道者有壞大以為小削遠以為近是以道術破碎而難知也

五行

原注五行者五常之形氣也書云初一曰五行次二曰敬用五事言進用五事以順五行也五事失

而五行之序亂五星之變作皆出於律歷之數而分為一者也其法亦起五德終始推其極則無不至而小數

家因此以為吉凶而

有著龜

原注著龜者聖人之所用也書曰汝則有大疑謀及

卜筮易曰定天下之吉凶成

有數術

原注數術者皆明堂義和史卜之職

也**有雜占**

原注雜占者紀百事之象候善惡之徵象占非一也

有形法

原注形法者大舉九

州之勢以立城郭室舍形人及六畜骨法之度數器物之形容以求其聲氣貴賤吉凶猶律有長短而各徵其聲非有鬼神數自然也然形與氣相首尾亦有其形而無其氣有其氣而無其形此精微之獨異也**有醫**

經

原注醫經者原人血脉經絡骨髓陰陽表裏以起百病之本死生之分而用度歲石湯火所施調百藥齊

和之所宜也

有方技

原注方技者皆生之具王官之一守也

有神僊

原注神僊者所以保

性命之真而游求於其外者也聊以盪意平心同死生之域而無怵惕於冑中然或者專以為務則誕欺怪迂之文彌以益多非有識緯
原注圖識及
聖王之所以教也
奇邪小技又有

風角

謹案後漢書郎顗傳注風角謂候四方四隅之風以占吉凶也

遁甲

原注七志有遁甲經推六

甲之陰而隱遁也

太乙九宮

原注乾鑿度曰太乙取其數以行九宮鄭玄註云太乙者北辰神名

也下行八卦之宮每四乃還於中央中央者北神之所居故謂之九宮天數大分以陽出以陰入陽起於子陰起於午是以太乙下九宮從坎宮始自此而從於坤宮又自此而從於震宮又自此而從於巽宮所以行半矣

還息於中央之宮既又自此而從於乾宮又自此而從於兌宮又自此而從於艮宮又自此而從於離宮行則

周矣上游息於太乙之宮而反紫

六日七分

謹案後漢書郎顗傳

注易稽覽圖曰甲子卦氣起中孚六日八十分日之七鄭玄注云六以候也八十分為一日之七者一卦六日

七分

日者

原注卜筮占候時日通名墨子曰墨子北之齊遇日者曰帝以今日殺黑龍於北方

而先生之色黑不可以北墨子

逢占

原注逢人所

射覆

原注於覆器之下而

挺專

原注挺大寧反楚辭索瓊茅以筵專王逸註曰筵八段竹

也楚人名結

須臾原注七志有武王須臾一

孤虛

原注

書藝文志有風后孤虛二十卷陰陽家謂孤魁罡之屬

原注陰陽家謂戌為天罡辰為河魁

不可殫記拘礙泥窒偏駁龍亂反害

乎道至於逆知前億教人為亂資之為盜誤國殺天下

喪身覆族而不悔者皆是也鴻儒碩士亦往往為所誤

如董仲舒之下吏

原注漢書董仲舒為江都治國以春秋災異之變推陰陽所以錯行故求

雨閉諸陽縱諸陰其止雨反是行之一國未嘗不得所欲中廢為中大夫先是遼東高廟長陵高園殿災仲舒居家推說其意草藁未上主父偃候仲舒私見嫉之竊其書而奏焉上召視諸儒仲舒弟子呂步舒不知其師書

以為大愚於是下仲舒吏當死詔赦之仲舒遂不敢復言災異

夏侯勝之囚縛

原注勝從始昌

受尚書及洪範五行傳說災異昌邑王立赦出勝當乘輿前諫曰天久陰而不雨臣下有謀上者王怒謂勝為

妖言縛以屬吏

睦孟京房之誅戮

原注睦弘字孟元鳳三年太山有大石自立昌邑有枯社

木卧復生孟以為當有從匹夫為天子者而不知其所
在即說曰先師董仲舒有言雖有繼體守文之君不害
聖人之受命漢家先後有傳國之運漢帝宜誰差天下
求索賢人禮以帝位而退自封百里如殷周二王後以
承順天命孟使友人內官長賜上此書時昭帝幼大將
軍霍光秉政惡之下其書廷尉奏賜孟妄設妖言惑衆
大逆不道皆伏誅

京房事見前註

李尋之流放

原注李尋好洪範災異又學天文月令陰陽事

大司馬王根薦尋待詔黃門每有災異輒問尋遷黃門
侍郎哀帝又疾尋所薦待詔賀良等建言改元易號上
疾自若詔以良等誣罔不道皆
伏誅尋減死一等徙燉煌郡

郎顗之賊殺

原注後漢書郎顗父

宗字仲綏學京氏易善風角星筭六日七分能望氣占
候顗少傳父業兼明經典畫研精義夜占象度公車累

徵詣闕上疏陳災變後復張衡襄楷特幸而免爾原注

張衡

善機巧尤致思於天文陰陽歷算公車徵為太史令遊
乃研覈陰陽妙盡璇機之政作渾天儀著靈憲算罔論
言甚詳明後復造候風地動儀崔瑗稱之曰數術窮天
地制作侔造化永和初為河間相三年徵拜尚書卒
襄楷好學博古善天文陰陽之術桓帝時宦官專朝災
異尤數楷詣闕上疏不省復上書詔尚書問狀尚書承
旨奏楷假借星宿造合私意誣上罔事收送洛陽獄帝
以楷言天文恒象之數故不誅猶司寇論刑靈帝即位
與荀爽鄭玄俱以博
士徵不至卒於家
嗚呼數以行道其弊至於殺天下

後世曷若不為之愈乎凡非六經所載仲尼之門所不
道者皆不可以為學也技術為秦漢以來亂本而前史

屢書特書故推本所自以為戒亦著於篇

謹案華佗傳文闕止存議

議曰醫家切於養生故為上技自神農味百穀辨草木
飛走之屬別金石之性使人用萬物而後黃帝岐伯論
著方書為萬世生生之具聖人之事也至戰國之際素
問諸書始出故其文不類其義則精奧深切非聖人莫
能為之其論氣數之際殆與六經相表裏特心傳口授
至戰國先秦筆之於書耳以醫名家見於載籍者自扁

鵲秦和倉公而下祇有華佗其砭熅方藥至於剖腹滌腸固為絕技若夫導引之術假五禽以為戲則古之節宣其氣勿使壅底之道不針不藥致之太和尤其妙者可謂良醫矣而為操所賊惜哉

謹案此下有薊子訓左慈傳今闕

甘始東郭延年

原注漢武內傳曰延年字公游

封君達三人者皆方士

也率能行容成御婦人術或飲小便或自倒懸愛耆精氣不極視大言甘始元放延年皆為操所錄問其術而

行之

原注曹植辨道論曰甘始者老而有少容自諸術士咸共歸之然始辭繁寡實頗切怪言余嘗

辟左右獨與之言問其所行溫顏以誘之美辭以導之始語余吾本師姓韓字雅嘗與師於南海作金前後數四投數萬斤金於海又言諸梁時西域胡來獻香屬腰帶割玉刀時悔不取也又言車師之西國兒生劈背出脾欲其食少而怒行也又言取鯉魚五寸一雙令其餌藥共投沸膏中有藥者奮尾鼓鰓游行沈浮有若處深淵其一者已熟而可啖余時問言寧可試不言是藥此踰萬里當出塞始不自行不能得也言不盡于此頗難悉載故粗舉其巨怪者始若遭秦始皇漢武帝則復徐市藥大之徒也

號青牛師

原注漢武帝內傳曰封君達隴西人初服黃連五十餘年入烏舉山服水銀百餘年

還鄉里如二十者常乘青牛故號青牛道人聞有病死者識與不識便以腰間竹管中藥與服或下針應

手皆愈不以姓名語人聞魯女生得五岳圖連年請求女生未見授并告節度二百餘歲乃入玄丘山去凡此數人皆百餘歲及二百歲也

王真

謹按後漢書注云字叔真上黨人

視之面有光澤似未五十者周

流五嶽名山能行胎息胎食之方嗽

原注音朔

舌下泉咽之

不絕房室

原注習閉之而吞之名曰胎息習嗽舌下泉而飲之名曰胎食

郝孟節上黨人能含棗核不食可至五年十年又能結氣不息身不動搖狀若死人可至百日半年亦有室家為人謹質不妄言似士君子曹操使領諸方士焉

李意其蜀人也世傳見之漢文帝時昭烈欲伐吳遣人
迎意其到敬禮之問以吉凶意其不答而求紙筆畫作
兵馬器仗十數紙已便一一以手裂壞之又畫作一大
人掘地埋之便徑去昭烈怒遂行為吳所敗還忿耻發
病崩乃知意其畫作兵仗而壞之即兵敗也大人而埋
之即昭烈崩意也

議曰子訓諸人皆誕異不經之術所謂左道惑世亂衆
者也王法所必誅而竟以術免迂怪之士益神矣人之

受命修短有數故堯不為壽顏不為夭必以智計超出能至數百年則術可以逾數力可以制命人可以造天矣不可以訓孔子所以不語怪力亂神也昔孝武晚年悔過每對羣臣自歎曰鄉時愚惑為方士所欺天下豈有神僊盡妖妄爾節食服藥蓋可少病而已此躬踐其事然後知其非可以為鑒也

謹案目錄此下有周羣傳今闕

杜瓊字伯瑜蜀郡成都人也少受學任安精究安術劉

璋時辟為從事昭烈領益州牧以瓊為議曹從事末帝
即位拜諫議大夫遷左中即將大鴻臚太常為人靜默
少言闔門自守不與世事蔣琬費禕等皆器重之雖學
業入深初不視天文有所論說後進通儒譙周常問其
意瓊答曰欲明此術甚難須當身視識其形色不可信
人也晨夜苦劇然後知之復憂漏泄不如不知是以不
復視也周因問曰昔周徵君以為當塗高者魏也其義
云何瓊答曰魏闕名也當塗而高聖人取類而言耳又

問周曰寧復有所怪耶周曰未達也瓊又曰古者名官
職不言曹始自漢以來名官盡言曹吏言屬曹卒言侍
曹此殆天意也瓊年八十餘延熙十三年卒著韓詩章句
十餘萬言不教諸子內學無傳業者周緣瓊言乃觸類
而長之曰春秋傳著晉穆侯名太子曰仇弟曰成師師
服曰異哉君之名子也嘉耦曰妃怨耦曰仇今君名太
子曰仇弟曰成師始兆亂矣兄其替乎其後果如服言
及漢靈帝名二子曰史侯董侯既為帝後皆免為諸侯

與師服言相似也昭烈諱備其訓具也末帝諱禪其訓授也言劉已具矣當授與人也意者甚於穆侯靈帝之名子後宦人黃皓弄權於內景耀五年宮中大樹無故自折周深憂之無所與言乃書柱曰衆而大期之會具而授若何復言曹者衆也魏者大也衆而大天下其當會也具而授如何復有立者乎漢既亡咸以周言為驗周曰此雖已所推尋然其所因由杜君之辭而廣之爾殊無神思獨至之意也何宗字彥英蜀郡郫人也事廣

漢任安精究安術與杜瓊同師而名聞過之劉璋時為
犍為太守昭烈定益州領牧辟為從事祭酒後援引圖
讖勸昭烈即尊號踐阼之後遷為大鴻臚建興中卒子
雙字漢偶滑稽談笑有淳于髡東方朔之風為雙栢長
早卒

議曰國家將興必有禎祥將亡必有妖孽動乎蓍龜見
乎四體蓋誠于中形于外氣焰之所激發朕兆之所著
見變日星移物產興謳歌起怨讟有不能揜者智者觀

之廢興之由可知矣未必指擬姓氏名字啓覬覦而亂天下也自偽莽盜漢造作符命姦人因之遂為讖記以世祖之明德而亦惑之漢道于是不純矣桓靈之季遂有當塗高代漢之訛既誤袁氏終成操丕譙周又衍杜瓊之言為備具禪授之論方之仇與成師卒勸末帝舉國降魏隕昭烈之業而遺辱宗社嗚呼邪說之禍甚矣

欽定四庫全書

卷七十二上

欽定四庫全書

續後漢書卷七十二中

元 郝經 撰

列傳第六十九中

技術

魏

朱建平

周宣

馬鈞

管輅

謹案朱建平傳闕

周宣

謹案魏志字孔和樂安人也

為郡吏太守楊沛夢人曰八月一

日曹公當至必與君杖飲以藥酒使宣占之是時黃巾賊起宣對曰夫杖起弱者藥治人病八月一日賊必除滅至期賊果破後東平劉禎夢蛇生四足穴居門中使宣占之曰此為國夢非君家之事也當殺女子而作賊者頃之女賊鄭姜遂俱夷討以蛇女子之祥足非蛇之所宜故也曹丕問宣曰吾夢殿屋兩瓦墮地化為雙鴛鴦此何謂也宣對曰後宮當有暴死者丕曰吾詐卿耳宣曰夫夢者意爾苟以言便占吉凶言未畢黃門令奏宮

人相殺無幾丕復問我昨夢青氣自地屬天宣對曰天下當有貴女子冤死是時丕已遣使賜甄后璽書問宣言而悔之遣人追使者不及丕復問曰吾夢摩錢文欲令滅而更愈明此何謂耶宣悵不對丕重問之宣對曰此自陛下家事雖意欲爾而太后不聽是以文欲滅而明爾時丕欲治弟植之罪偏於太后但加貶爵以宣為中郎屬太史嘗有問宣曰吾昨夢見芻狗其占何也宣曰君欲得美食爾有頃出行果遇善膳復又問宣曰吾

昨復夢見芻狗何也宣曰君欲墮車折脚宜戒慎之頃之果如宣言後又問宣昨夢見芻狗何也宣曰君家欲失火當善護之俄遂火起語宣曰前後三時皆不夢也聊試君爾何以皆驗耶宣曰此神靈動君使言故與真夢無異也又問宣曰三夢芻狗而其占不同何也宣曰芻狗者祭神之物也故君始夢當得飲食也祭祀既訖芻狗為車所轢故中夢當墮車折足也芻狗既車轢之後必載以為樵故後夢憂失火也宣之叙夢凡此類也

十中八九世以比建平之相焉

謹案目錄附馬鈞今闕

管輅字公明平原人也幼聰敏八九歲即喜仰視天文

父母禁之不可曰家雞野鷺

謹案陳志作野鷺

猶尚知時況於

人乎及長又善周易星數風角占相無不精究容貌粗

醜無威儀而嗜酒飲食言戲不擇非類故人多愛之而

不敬也嘗曰廉介細直士之浮飾不足務也知我者稀

則我貴矣

原注輅別傳輅年八九歲便喜仰視星辰得人輅問其名夜不肯寐父母常禁之猶不可

止自言我雖年小然眼中喜視天文常云家雞野鷺猶尚知時況於人乎與鄰比兒共戲土壤中輅畫地作天

文及日月星辰每答言說事語皆不常宿學者人不能折之皆知其當有大異之材及成人果明周易仰觀風角占相之道無不精微體性寬大多所含受憎已不仇愛已不褒每欲以德報怨常謂忠孝信義人之根本不可不厚廉介細直士之浮飾不足為務也自言知我者稀則我貴矣安能斷江漢之流為激石之清樂與季主論道不欲與漁父同舟此吾志也其事父母孝篤兄弟順愛士友皆仁和發中終無所闕臧否之士晚亦服焉父為瑯琊即丘長時年十五來至官舍讀書始讀詩論語及易本便開濶布筆解義斐然於時譽上有遠方及國內諸生四百餘人皆服其才也瑯邪太守單子春雅有才度間輅一翼之雋欲得見輅父即遣輅造之大會賓客百餘人座上有能言之士輅問子春府君名士加有雄貴之姿輅既年少膽未堅剛若欲相觀懼失精神請先飲三升清酒然後得而言之子春大喜便酌三升清酒獨使飲之酒盡然後問子春今欲與輅為對者若

府君四座之士邪子春曰吾欲自與卿旗鼓相當輅言始讀詩論易本學問微淺未能上引聖人之道陳秦漢之事但欲論金木水火土鬼神之情爾子春言此最難者而卿以為易耶於是唱大論之端遂經於陰陽文采葩流枝葉橫生少引聖籍多發天然子春及衆士互共攻劫論難蜂起而輅人人對答言皆有餘至日向暮酒食不行子春語衆人曰此年少盛有才器聽其言論正似司馬犬子游獵之賦何其磊落雄壯英神以茂必能明天文地理變化之數不徒有父為利漕利漕民郭恩言也於是發聲徐州號之神童

兄弟三人皆得臂疾使輅筮其所由輅曰卦中有君本墓墓中有女鬼非君伯母當叔母也昔飢荒之世當有利其數升米者排著井中嘖嘖有聲推一大石下破其

頭孤魂冤痛自訴於天於是恩流涕服罪曰誠有斯事

兄弟暨來三十載如棘子但願不及子孫爾輅曰火形

不絕水形無餘不及後也

原注輅別傳利漕民郭思字義博有才學善周易春秋又

能仰觀輅就義博讀易數十日中午意便開發言難踰師於此分著下卦用思精妙占爻上諸生疾病死亡貧富

喪衰初無錯舛莫不驚怪謂之神人也又從義博學仰觀三十日中午通夜不卧語義博君但相語墟落處所爾

至於推運會論災異自當出吾天分學未一年義博反從輅問分著及天文事要義博每聽輅語未嘗不推机

慷慨自言登聞君至論之時忘我篤疾明闇之不相逮何其遠也義博設主人獨請輅具告辛苦自說兄弟三

人俱得暨疾不知何故試相為作卦知其所以若各歎者天道教人當為吾祈福於神明勿有所愛兄弟俱

行此為更生輅作卦思之未詳會日夕因留宿至中夜語義博曰吾以此得之既言其事義博悲涕沾衣曰皇漢之末實有斯事君不名主諱也我不得言禮也兄弟變未三十餘載脚如棘子不能復治但願不及子孫爾輅言火形不絕水廣平劉奉林婦病困已買棺器時止形有餘不及後也

月也使輅占曰命在八月辛卯日日中之時奉林謂必

不然而婦漸差至秋發動一如輅言

原注輅別傳鮑子春為列人今有明

思才理與輅相見曰聞君為劉奉林卜婦死七日何其詳妙試為論其意義輅論爻象之旨說變化之義若規圓矩方無不合也子春自言吾少好談易又喜分著可謂盲者欲視白黑聾者欲聽清濁苦而無功也聽君語後自視體中真輅往見安平太守王基基令作卦輅曰為憤憤者也

當有賤婦人生一男兒墮地便走入竈中死又牀上當
有一大蛇銜筆小大共視須臾去之也又烏來入室中
與燕共鬪燕死烏去有此三怪基大驚問其吉凶輅曰
直官舍久遠魑魅魍魎為怪爾兒生便走非能自走直
宋無忌之妖將其入竈也大蛇銜筆直老書佐爾烏與
燕鬪直老鈴下爾今卦中見象而不見其凶知非妖咎
之徵自無所憂也後卒無患

原注輅別傳基與輅共論
易數日中大以為喜樂語

輅言俱相間善卜定共清論君一時異才當上竹帛也
輅為基出卦知其无咎因謂基曰昔高宗之鼎非雉所

鵠殷之階庭非木所生而野鳥一鵠武丁為高宗桑穀
暫生太戊以興焉知三事不為吉祥願府君安身養德
從容光大勿以知時信都令家婦女驚恐更互疾病使
神姦污累天真也

輅筮之輅曰北堂西頭有兩死男子一男持矛一男持
弓箭頭在壁內脚在壁外持矛者主刺頭故頭重痛不
得舉也持弓者主射胸腹故心中縣痛不得飲食也書

則浮游夜來病人故使驚恐也於是掘徙骸骨家中皆

愈

原注輅別傳王基即遣信都令還掘其室中入地八尺果得二棺一棺中有矛一棺中有角弓及箭箭久

遠木皆消爛但有鐵及角完耳及徙骸骨去城一十里埋之不復疾病基曰吾少好讀易玩之已久不謂神明

之數其妙如此使從輅學易推論天文輅每開變化之象演吉凶之兆未嘗不纖微委曲盡其精神基曰始聞君言如何可得終以昏亂此自天授非人力也於是藏周易絕思慮不復學卜筮之事輅鄉里乃太原閭輅君往者為王府君論怪云老書佐為蛇老鈴下為鳥此本皆人何化之微賤乎為見於爻象出君意乎輅言苟非性與天道何由背爻象而任胃心者夫萬物之化無有常形人之變異無有常體或大為小或小為大固無優劣夫萬物之化一例之道也是以夏鯨天子之父趙王如意漢祖之子而鯨為黃熊如意為蒼狗斯亦至尊之位而為黔喙之類也况蛇者協辰巳之位鳥者棲太陽之精此乃騰黑之明象白日之流景如書佐鈴下各以微軀化為蛇鳥不亦過乎

清河王經去官還家輅與相見經曰近有

一怪大不喜之欲煩作卦卦成輅曰爻吉不為害也君

夜在堂戶前有一流光如燕爵者入君懷中殷殷有聲

內神不安解衣彷徨招呼婦人覓索餘光經大笑曰實

如君言輅曰吉遷官之徵也其應立至頃之經為江夏

太守

原注輅別傳經欲使輅卜而有疑難之言輅笑而答之曰君備州里達人何言之鄙昔司馬季主有

言夫卜者必發天地象四時順仁義伏義作八卦周文王三百八十四爻而天下治病者或以愈且死或以生

患或以免事或以成嫁女娶妻或以生長豈直數千錢哉以此推之急務也苟道一明聖賢不讓况吾小人敢

以為難彛緯斂手謝輅前言戲之耳於是輅為作卦其言皆驗經每論輅以為得雲龍之精能養和通幽者非

徒合會之才也輅又至郭恩家有飛鳩來家在梁頭鳴甚悲輅曰

當有老公從東來攜豚一頭酒一壺主人雖喜當有小
故明日果有客如所占恩使客節酒戒肉慎火而射雞

作食箭從樹中間激中數歲女子手流血驚怖

原注輅別傳義

博從輅學鳥鳴之候輅言君雖好道天才既少又不解
音律恐難為師也輅為說八風之變五音之數以律呂
為衆鳥之商六甲為時日之端反覆譴曲出入無窮義
博靜然沉思馳精數日卒無所得義博言才不出位難
以追徵於此遂止輅至安德令劉長仁家有鳴鵲來在閣屋上

其聲甚急輅曰鵲言東北有婦昨殺夫牽引西家人夫
離妻候不過日在虞淵之際告者至矣到時果有東北

內俊士八九人矣蔡元才在朋友中最有清才在衆人中言本間卿作狗何意為龍輅言潛陽未變非卿所知焉有狗耳得聞龍聲乎景春言今當遠別後會何期且復共一射覆輅占既皆中景春大笑卿為我論此卦意紓我心懷輅為開文散理分賦形象言徵辭合妙不可過景春及衆客莫不言聽後論之美勝於射覆之樂景春與輅別戒以二事言卿性樂酒量雖溫克然不可保寧當節之卿有水鏡之才所見者妙仰觀雖神禍如膏火不可不慎持卿處才游於雲漢之間不憂不富貴也輅言酒不可極才不可盡吾欲持酒以禮持才以愚何患之有也輅族兄孝國居在斥丘輅往從之與二客會客去後輅謂孝國曰此二人天庭及口耳之間同有凶氣異變俱起雙魂無宅

原注輅別傳輅又曰厚味腊毒天精幽夕坎為棺槨允為喪車流魂

於海骨歸於家少許時當並死也復數十日二人飲酒醉夜
共載車牛驚下道入漳河中皆即溺死當此之時輅之隣里
外戶不閉無相偷竊者清河太守華表召輅為文學掾
安平趙孔曜薦於冀州刺史裴徽曰輅雅性寬大與世
無忌仰觀天文則同妙甘公石申俯覽周易則齊思季
主今明使君方垂神幽藪留精九臯輅宜蒙陰和之應
得及羽儀之時徵於是辟為文學從事引與相見大善
友之徙部鉅鹿遷治中別駕初應州召與弟季儒共載

至武城西自卦吉凶語儒云當在故城中見三狸爾者
乃顯前到河西故城角正見三狸共踞城側兄弟並喜

正始九年舉秀才

原注輅別傳輅為華清河所召為北
豐文學一時士友無不歎慕安平趙

孔曜明敏有思識與輅有管鮑之分故從發干來就郡
輅上與輅相見言卿腹中汪汪故時死人半今生人無
雙當去俗騰飛翔翔吳蒼云何在此間卿消息使吾食
不甘味也冀州裴使君才理清明能釋玄虛每論易及
老莊之道未嘗不注精於嚴瞿之徒也又眷吾意重能
相明信者今當故往為卿陳感虎開石之誠輅言吾非
四淵之龍安能使白日晝陰卿若能動東風興朝雲吾
志所不讓也於是遂至冀州見裴使君使君言君顏色
何以消滅於故耶孔曜言體中無藥石之疾然見清河
郡內有一騏驎拘繫後廡歷年去王良伯樂百八十里

不得驂天骨起風塵以此憔悴耳使君言驂今何在
也孔曜言平原管輅字公明年三十六雅性寬大與世
無忌可為士雄仰觀天文則能同妙甘公石申俯覽周
易則能齊思季主游步道術開神無窮可為士英抱荆
山之璞懷夜光之寶而為清河郡所錄北黌文學可為
痛心疾首也使君方欲流精九臯垂神幽藪欲令明主
不獨治逸才不久滯高風遐被莫不草靡宜使輅特蒙
陰和之應得及羽儀之時必能翼宣隆化揚聲九圍也
裴使君間言則慷慨曰何乃爾耶雖在大州未見異才
可用釋人鬱悶者思還京師得共論道耳況草間自有
清妙之才乎如此使相為取之莫使驂更為凡馬荆
山反成凡石即掇名輅為文學從事一相見清論終日
不覺罷倦天時大熱移牀在庭前樹下乃至雞向晨然
後出再相見便轉為鉅鹿從事三見轉治中四見轉為
別駕至十月舉為秀才輅辭裴使君使君言丁鄧二尚
書有經國才畧於物理不精也何尚書神明精微言皆

巧妙巧妙之志殆破秋毫君當慎之自言不解易九事
必當以相問比至洛宜善精其理也輅言何若巧妙以
攻難之才游形之表未入於神夫入神者當步天元推
陰陽探玄虛極幽明然後覽道無窮未暇細言若欲差
次老莊而參爻象愛微辨而興浮藻可謂射侯之巧非
能破秋毫之妙也若九事皆至義者不足勞思也若陰
陽者精之已久輅去之後歲朝當有時刑大風風必
推破樹木若發於乾者必有天威不足共清談者 十

二月二十八日吏部尚書何晏請輅鄧颺在晏許輅與
晏談久之颺謂輅曰君名善易而語初不及易中辭義
何也輅曰夫善易者不言易也晏含笑贊之曰可謂要
言不煩也晏遂問易九事輅辨析明暢晏曰君論此世

無雙

謹案陳志君論下有陰陽二字

因謂輅曰試為作一卦知位當至

三公否又問連夢青蠅數十來在鼻上驅之不去輅曰夫飛鵠天下賤鳥及其在林食榘則懷我好音況輅心非草木敢不盡忠昔元凱之弼重華宣慈惠和周公之翼成王坐而待旦故能流光六合萬國咸寧此乃履道休應非卜筮之所明也今君侯位重山嶽勢若雷電而懷德者鮮畏威者衆殆非小心翼翼多福之仁夫鼻者艮天中之山

原注裴松之曰按相書謂鼻之所在高而為天中鼻有山象故曰天中之山

不危所以長守貴今青蠅臭惡而集之位峻者顛輕豪
者亡不可不思害盈之數盛衰之期是故山在地中曰
謙雷在天上曰壯謙則裒多益寡壯則非禮不履未有
損已而不光大行非而不傷敗願君侯上追文王六爻
之旨下思尼父彖象之義然後三公可決青蠅可驅也
颺曰此老生之常談輅曰夫老生者見不生常談者見
不談晏謝之曰知幾其神乎古人以為難交疏而吐其
誠今人以為難君今一面而盡二難之道可謂明德君

子矣過歲更當相見輅還邑舍具以語舅氏舅氏責輅
言太切至輅曰與死人語何所畏邪舅大怒謂輅狂悖
歲朝西北大風塵埃蔽天十餘日間晏颺皆誅然後舅
氏乃服謂輅曰爾何以知何鄧之敗為已有凶氣耶輅
曰與禍人共會然後知神明交錯與吉人相近又知聖
賢求精之妙夫鄧之行步筋不束骨脉不制血

謹案志
注血作

肉起立傾倚若無手足此為鬼躁何之視候則魂不守
宅血不華色精爽烟浮容若槁木此為鬼幽故鬼躁者

為風所收鬼幽者為火所燒二者皆非遐福之象自然

之符不可蔽也

原注輅別傳輅後因得休裴使君問何平叔一代才名其實何如輅曰其才若

盆盎之水所見者清所不見者濁神在廣博志不務學弗能成才欲以盆盎之水求一山之形形不可得則智由此惑故說老莊則巧而多華說易生義則美而多偽華則道浮偽則神虛得上才則淺而流絕得中才則游精而獨出輅以為少功之才也裴使君曰誠如來論吾數與平叔共說莊老及易常覺其辭妙於理不能折之又時人吸習皆歸服之焉益令始輅過魏郡太守鍾毓不了相見得清言然後灼灼耳

共論易義輅因言卜可知君生死之日毓使筮其生月

日如言無蹉跌毓大愕曰君可畏也死以付天不以付

君遂不復筮。毓問輅：「天下當太平否？」輅曰：「方今四九天，飛利見大人，神武升建，王道文明，何憂不平？」毓未解輅

言，無幾曹爽等誅乃覺寤云。

原注：輅別傳：魏郡太守鍾毓清逸，有才難輅易二十

餘事自以為難之至精也。輅尋聲投響，言無留滯。分張交象義，皆殊妙。毓即謝輅，輅卜知。毓生月日，毓愕然曰：「聖人運神通化，連屬事物，何聰明乃爾？」輅言：「幽明同化，死生一道，悠悠太極終而復始，文王捐命，不以爲憂。仲尼曳杖，不以為懼，緒煩著筮，宜盡其意。毓曰：『生者好事，死者惡事，哀樂之分，吾所不能齊。』且以付天，不以付君，也。石苞爲鄴典農，與輅相見，問曰：『間君鄉里翟文耀能隱形，其事可信乎？』輅言：『此但陰陽蔽匿之數，苟得其數，則四岳可藏，河海可逃，況以七尺之形，游變化之內，散雲霧以幽身，布金水以滅迹，術足數成，不足爲難。』苞曰：

欲聞其妙君且善論其數也輅言夫物不精不為數不
妙不為術故精者神之所合妙者智之所遇合之幾微
可以性通難以言論是故魯班不能說其手離婁不能
說其目非言之難孔子曰書不盡言言之細也言不盡
意意之微也斯皆神妙之謂也請舉其大體以驗之夫
白日登天運景萬里無物不照及其入地一炭之光不
可得見三五盈月清耀燭夜可以遠望及其在晝明不如鏡
今逃日月者必陰陽之數陰陽之數通於萬類鳥獸猶化況
於人乎夫得數者妙得神者靈非徒生者有驗死亦有
徵是以杜伯乘火氣以流精彭生託水變以立形是故
生者能出亦能入死者能顯亦能幽此物之精氣化之
游魂人鬼相感數使之然也苞曰日見陰陽之精氣化之
於君君何以不隱輅曰夫陵虛之鳥愛其清高不願江
漢之魚淵沼之魚樂其濡濕不易騰風之鳥由性異而
分不同也僕自欲立身以明道直己以親義見數不以
為異知術不以為奇夙夜研機孳孳溫故而索隱行怪

未暇斯務也

平原太守劉郇取印囊及山雞毛著器中使筮

輅曰內方外圓五色成文含寶守信出則有章此印囊

也高嶽巖巖有鳥朱身羽翼玄黃鳴不失晨此山雞毛

也郇曰此郡官舍連有變怪使人恐怖其理何由輅曰

或因漢末之亂兵馬擾攘軍尸流血污染丘山故因昏

夕多有怪形也明府道德高妙自天祐之願安百祿以

光休寵

原注輅別傳故郡將劉郇字令元清和有思理好易而不能精與輅相見意甚喜歎自說注易

之向託也

輅言今明府欲勞不世之神經緯大道誠富美之秋然輅以為注易之急急于水火之難登時之

驗易之清濁延於萬代不可不先定其神而後垂明思
也自旦至今聽採聖論未有易之一分易安可注也輅
不解古之聖人何以處乾位於西北坤位於西南夫乾
坤者天地之象然天地至大為神明君父覆載萬物生
長無首何以安處二位與六卦同列乾之象豕曰大哉
乾元萬物資始乃統天夫統者屬也尊莫大焉何由有
別位也邵依易繫辭諸為之理以為注不得其要輅尋聲
下難事皆窮析曰夫乾坤者易之祖宗變化之根源今
明府論清濁者有疑則無神忌非注易之符也輅於
此為論八卦八卦之道及爻象之精大論開廊衆化相
連邵所解者皆以為妙所不解者皆以為神自說欲著
易八年用思勤苦歷載靡寧定相得至論此才不及易
不愛久勞喜承雅言如此相為高枕偃息矣欲從輅學
射覆輅言今明府以虛神於注易亦宜絕思於靈蓍靈
蓍者二儀之明數陰陽之幽契施之於道則定天下吉
凶用之於術則收天下毫釐纖微未可以為易也邵曰

以為術者易之近數欲求其端耳若如來論何事於斯
留輅五日不遑恤官但共清談邠自言數與何平叔論
易及老莊之道至於精神遐流與化周旋清若金水鬱
若山林非君侶也邠又曰此郡官舍連有變怪變怪多
形使人怖恐君似當達此數者其理何由也輅言此
郡所以名平原者本有原山無木石與地自然舍陰
不能吐雲含陽不能激風陰陽雖弱猶有微神微神不
真多聚凶蟲以類相求魍魎成羣或因漢末兵馬擾攘
軍尸流血汚染丘岳殭魂相感變化無常故因昏夕之
時多有怪形也昔夏禹文朋不怪於黃龍周武信時不
惑於暴風今明府道德高妙神不懼妖自天祐之吉无
不利願安百祿以光休寵也邠曰聽雅論為近其理每
有變怪輅聞鼓角聲音或見弓劍形象夫以土山之精
伯有之魂實能合會干犯明靈也邠問輅易言剛健篤
實輝光日新斯為同不也輅曰不同之名朝旦為輝日
中為光晉諸公讚邠本名炎犯晉太子諱改為邠位至

太子僕子梓字純嘏侍中次宏字終嘏太常次漢字仲嘏光祿大夫漢清冲有貴識名亞樂廣宏子咸徐州刺史次耽晉陵内史耽子恢字真長尹丹陽為中興名士也

清河令徐季龍使人行獵

令輅筮其所得輅曰當獲小獸復非食禽雖有牙爪微而不強雖有文章蔚而不明非虎非雉其名曰狸獵人暮歸果如輅言季龍取十三種物著大篋中使輅射云器中藉藉有十三種先說雞子後道蠶蛹遂一一名之惟以梳為枇耳季龍因與輅論龍動則景雲起虎嘯則谷風生以為火星者龍參星者虎火出則雲應參出則

風到此乃陰陽之感化非龍虎之所致也輅曰夫論難
當先審其本然後求其理理失則機謬機謬則榮辱之
主若以參星為虎則谷風為寒霜之風寒霜之風非東
風之名是以龍者陽精以潛為陰幽靈上通和氣感神
二物相扶故能興雲夫虎者陰精而居於陽依木長嘯
動於巽林二數相感謹案二數
志作二氣故能運風若磁石之取
鐵不見其神而金自來有徵應以相感也况龍有潛飛
之化虎有文明之變招雲召風何足為疑李龍曰夫龍

之在淵不過一井之底虎之悲嘯不過百步之中形氣
淺弱所通者近何能測景雲而馳東風輅曰君不見陰
陽燧近在掌握之中形不出手乃上引太陽之火下引
太陰之水噓吸之間烟景以集苟精氣相通懸象應乎
二氣苟不相感則二女同居志不相得自然之道無有
遠近季龍曰世有軍事則雞雉先鳴其道何由復有他
占惟在雞雉而已輅言貴人有事其應在天在天則日
月星辰也兵動民憂其應在物在物則山林鳥獸也夫

雞者兌之畜金者兵之精雉者離之鳥獸者武之神故
太白揚輝則雞鳴熒惑流行則雉驚各感數而動又兵
之神道布在六甲六甲推移其占無常是以晉樞牛响
果有西軍鴻嘉石鼓鳴則有兵不專近在於雞雉也季
龍曰魯昭公八年有石言於晉師曠以為作事不時怨
讟動於民則有非言之物而言於理為合不輅曰晉平
奢泰崇飾宮室斬伐林木殘破金石民力既盡怨及山
澤神痛人感二精並作金石同氣則兌為口舌之妖動

於靈石傳曰輕百姓飾城郭則金不從革此之謂也

原注

輅別傳季龍欽嘉留輅經數日輅占獵既驗季龍曰君雖神妙但不多藏物耳何能皆得之輅言吾與天地參神著龜通靈抱日月而遊者冥極變化而覽未然況茲近物能蔽聰明季龍大笑君既不謙又念窮在近矣輅言君尚未識謙言焉能論道夫天地者則乾坤之卦著龜者則卜筮之數日月者離坎之象變化者陰陽之交杳冥者神化之原未然者幽冥之先此皆周易之綱紀何僕之不謙季龍於是取十三種物欲以窮之輅射之皆中季龍乃歎曰作者之謂輅隨軍西行過母丘儉祖聖述者之謂明豈此之謂乎

父墓下倚樹哀吟精神不樂人問其故輅曰林木雖茂無形可久碑誄雖美無後可守玄武藏頭蒼龍無足白

虎銜尸朱雀悲哭四危以備法當滅族不過二載其應至矣卒如其言後得休過清河倪太守時天旱倪問輅雨期輅曰今夕當雨是日暘燥晝無形似府丞及令在坐咸謂不然到鼓一中星月皆沒風雲並起竟成快雨

於是倪盛修主人禮共為懽樂

原注輅別傳輅與倪清河相見既刻雨期倪猶

未信輅曰夫造化之所以為神不疾而速不行而至十六日壬子直滿畢星中已有水氣水氣之發動於卯辰此必至之應也又天昨檄召五星宣布星符刺下東井告命南箕使召雷公電父風伯雨師羣岳吐陰衆川激精雲漢垂澤蛟龍含靈燼燼朱電吐咀香冥殷殷雷聲嘯吸雨靈習習谷風六合皆同歆唾之間品物流形天

有常期道有自然不足為難也倪曰談高信寡相為憂之於是使留輅往請府丞及清河令若夜雨者當為啖二百斤犢肉若不雨當住十日輅曰言念費損至期向暮了無雲氣衆人並嗤輅言樹上已有少女微風樹間又有陰鳥和鳴又少男風起衆鳥和翔其應至矣須臾果有良風鳴鳥日未入東南有山雲樓起黃昏之後雷聲動天到鼓一中星月皆沒風雲並起玄氣四合大雨河傾倪問輅言誤中爾不為神也輅曰誤中與天期不亦工乎

正元二年弟辰謂輅曰大將軍待君意厚冀當富貴乎輅常嘆曰吾自知有分直爾然天與我才名不與

我年壽恐四十七八間不見女嫁兒娶婦也若得免此欲作洛陽令可使路不拾遺枹鼓不鳴但恐至太山治

鬼不得治生人如何辰問其故輅曰吾額上無生骨眼中無守精鼻無梁柱脚無天根背無三甲腹無三壬此皆不壽之驗又吾本命在寅加月食夜生天有常數不可得諱但人不知爾吾前後相當死者過百人畧無錯也是歲八月為少府丞明年二月卒年四十八

原注輅別

傳既有才名遭朱陽之命於時名勢赫奕若大猛風疾當塗之士莫不枝附葉連賓客如雲無多少皆為設食賓無貴賤候之以禮京城紛紛非徒歸其名勢而已然亦懷其德焉向不天命輅之榮華非世所測也弟辰嘗欲從輅學卜及仰觀事輅言卿不可教爾夫卜非至精不能見其數非至妙不能觀其道孝經詩論足為三公

無用知之也。於是遂止。子孫無能傳其術者。辰叙曰：夫晉魏之士，見輅道術神妙，占候無錯，以為有隱書及象甲之數，辰每觀輅舊傳，惟有易林風角及鳥鳴仰觀星書三十餘卷，世所共有。然輅獨在少府官舍，無家人子弟隨之。其亡沒之際，好竒不哀喪者，盜輅書，惟餘易林風角及鳥鳴書還耳。夫術數有百數十家，其書有數千卷，書不少也。然而世鮮名人，皆由無才不由無書也。裴冀州何鄧二尚書及鄉里劉太常、潁州兄弟，以輅稟受天才，明陰陽之道，吉凶之情，一得其源，遂涉其流，亦不為難。常歸服之，輅自言與此五君共語，使人精神清發，昏不暇寐。自此以下，殆白日欲寢矣。又自言當世無所云，欲得與魯梓慎、鄭裨竈、晉卜偃、宋子韋、楚甘公、魏石申共登靈臺，披神圖，步三光，明災異，運蓍龜，決狐疑，無所復恨也。辰不以闇淺，得因孔懷之親，數與輅有所諮論。至於辨人物，析臧否，說近義，彈曲直，拙而不工也。若敷皇羲之典，揚文孔之辭，周流五曜，經緯三度，口滿聲。

溢微言風集若仰眺飛鴻漂漂今景沒若俯臨深溪香
香兮精絕偏以攻難而失其端欲受學求道尋以迷昏
無不扼腕推指退音響而長嘆也昔京房雖善卜及風
律之占卒不免禍而輅自知四十八當亡可謂明哲相
殊又京房目見遘譏之黨耳聽青蠅之聲面諫不從而
猶道路紛紜輅處魏晉之際藏智以朴卷舒有時妙不
見求愚不見遺可謂知幾相邀也京房上不量萬乘之
主下不避佞諂之徒欲以天文洪範利國利身因不能
世卒陷大刑可謂枯龜之餘智膏燭之朱景豈不哀哉
人多以輅疇之京房辰不敢許也至於仰察星辰俯
定吉凶遠期不失年歲近期不失日月辰以甘石之妙
不先也射覆名物見術流連東方朔不過也觀骨形而
審貴賤覽形色而知生死許負唐舉不超也若夫疏風
氣而探微候聽鳥鳴而識神機亦一代之奇也向使輅
官達為宰相大臣膏腴流於名世華曜列乎竹帛使幽
驗皆舉秘言不遺千載之後有道者必信而貴之無道

者必疑而怪之信者以妙過真夫妙與神合者得神則
無所感也恨輅才長命短道貴時賤親賢遐潛不宣於
良史而為鄙弟所見追述既自闇濁又從來久遠所載
占卜事雖不識本卦捃拾殘餘十得二焉至於仰觀靈
曜說魏晉興衰及五運浮沈兵革災異十不收一無源
何以成河無根何以垂榮雖秋菊可採不及春英臨文
慷慨復用哀慙將來君子幸以高明求其義焉往孟荆
州為列人典農常問亡兄昔東方朔射覆得何卦正知守
宮蜥蜴二物者亡兄於此為安卦生象辭喻文錯微義
豪起變化相推會於辰巳分別龍蛇各使有理言絕之
後孟荊州長嘆息曰吾聞君論精神騰躍殆欲飛散何
其汪汪乃至於斯邪裴松之曰案辰所稱鄉里劉太常
者謂劉實也辰撰輅傳是時為太常潁川則實弟智也
實智並以儒學為名無能言之世語稱實博辯猶不足
以並裴何之流又案輅自說云本命在寅則建安十五
年生也至正始九年應三十九而傳云三十六以正元

三年卒應四十七傳云四十八皆為不相應也近有閭
續伯者名讚該徵通物有良吏風為天下補綴遺脫敢
以所聞列於篇左皆從受之於大人先哲足以取信者
冀免虛誣之議云耳嘗受辰傳所謂劉太常者曰輅始
見聞由於為鄰婦卜亡牛云當在西面窮牆中縣頭上
向教婦人令視諸丘冢中果得牛婦人因以為藏已牛
告官案驗乃知以術知故裴冀州遂開焉又云路中小
人失妻者輅為卜教使明旦於東陽城門中伺擔豚人
率與共鬪具如其言豚逸走即共追之豚入人舍突破
主人甕婦從甕中出劉侯云甚多此類辰所載繞十一
二月劉侯云辰孝廉才也中書令史紀玄龍輅鄉里人
云輅在田舍嘗候遠鄰主人患數失火輅卜教使明日
於南陌上伺當有一角巾諸生駕黑牛故車必引留為
設賓主以能消之即從輅戒諸生有急求去不聽遂留
當宿意大不安以為圖已主人罷入生乃把刀出門倚
兩薪積間側立假寐歛有一小物直來過前如獸手中

持火以口吹之生驚舉刀斫正斷腰視之則孤自此主
人不復有災前長廣太守陳承祐口受城門校尉華長
駿語云昔其父為清河太守時召輅作吏駿與少小後
以鄉里遂加恩意常與同載周旋具知其事云諸要驗
三倍於傳辰既短才又年縣小又多在田舍故益不詳
辰任官至州主簿部從事太康之初物故駿又云輅卜
亦不悉中十得七八駿問其故輅云理無差錯來卜者
或言不足以宣事實故使爾華城門夫人者魏故司空
涿郡盧公女也得疾連年不差華家時居西城下南纏
里中三廡在其東南輅卜常有師從東方來自言能治
便聽使之必得其力後無何有南征廡驕當充甲卒來
詣盧公言能治女郎公即表請留之專使其子將詣華
氏療疾初用散藥後復用丸治尋有效即奏除驕名以
補太醫又云隨輅父在利漕時有治下屯民捕鹿者其
晨行還見毛血人取鹿處來詣廡告輅輅為卦語云此
有盜者是汝東巷中第三家也汝逕往門前伺無人時

取一瓦子密發其碓屋東頭第七椽以瓦著下不過明日食時自送還汝其夜盜者父病頭痛壯熱煩疼然亦來詣輅卜輅為發祟盜者具伏輅令擔皮肉臟還著故處病當自愈乃密教鹿主往取又語使復往如前舉椽棄瓦盜父亦差又都尉治內史有失物者輅使明晨於寺門外看當逢一人使指天畫地舉手四向自當得之暮果獲於故處矣

議曰建平之相宣之占夢億則屢中小數之雋也至於公明通占相合卜筮衍象數傳諸義理深造天人之際則技進於道矣其勉何晏以元凱輔堯舜周公相成王視鄧颺為死人謂為鬼幽鬼躁則有儒者之風非直技

術之士也

欽定四庫全書

續後漢書卷七十二下

元 郝經 撰

列傳第六十九下

技術

吳

吳範 劉惔 趙達 皇象

陳訓 葛洪

謹案吳範傳闕

劉惔字子仁平原人也遭亂避地客游廬陵事孫輔以

明天官達占數顯於南土每有水旱寇賊皆先時處期
無不中者輔以為軍師軍中咸敬事之號曰神明建安
中孫權在豫章時有星變以問惇惇曰災在丹陽權曰何
如曰客勝主人到某日當得問謹案問陳志作聞是時邊鴻作
亂卒如惇言惇於諸術皆善尤明太乙皆能推演其事
窮盡要妙著書百餘篇名儒刁玄稱為奇惇亦寶愛
其術不以告人故世莫得而明也

趙達河南人也少從漢侍中單父受學用思精密謂東

南有王者氣可以避難故脫身渡江治九宮一筭之術
究其微旨是以能應機立成對問若神至計飛蝗射隱
伏無不中效或難達曰飛者固不可校誰知其然此殆
妄爾達使其人取小豆數斗播之席上立處其數驗覆
果信嘗過知故知故為之具食食畢謂曰倉卒乏酒又
無嘉穀無以叙意達因取盤中隻箸再三縱橫之乃言
卿東壁下有美酒一斛又有鹿肉三斤何以辭無時坐
有他賓內得主人情主人慙曰以卿善射有無欲相試

爾竟效如此遂出酒又有書簡上作千萬數著空倉中
封之令達筭之達處如數云但有名無實其精微若是
惜其術自闕澤殷禮皆名儒善士親屈節就學達祕而
不告太史丞公孫滕少師事達勤苦累年欲許教之者
有年數矣臨當喻語而輒復止滕他日齋酒具候顏色
拜跪而請達曰吾先人得此術欲圖為帝王師至仕來
三世不過太史郎誠不欲復傳之且此術微妙頭乘尾
除一筭之法父子不相語然以子篤好不倦今真以相

授矣飲酒數行達起取數書兩卷大如手指達曰當寫
讀此則自解也吾久廢不復省之今欲思論一過數日
當以相與滕如期往至乃陽求索書驚言失之云女壻
昨來必是渠所竊遂從此絕初孫權行師征伐每令達
有所推步皆如其言權問其法達終不語由此見薄祿
位不至初權稱尊號令達筭作天子之後當復幾年達
曰高祖建元十二陛下倍之權大喜後果如達言達常
笑謂諸星氣風術者曰當迴筭帷幕不出戶牖以知天

道而反晝夜暴露以望氣祥不亦難乎閒居無為引筭
自校乃歎曰吾數訖盡某年月日其終矣達妻數見達
效聞而哭泣達欲弭妻意乃更筭言向者謬誤爾尚未
死後如期死權聞達有書求之不得乃錄問其女及發

棺無所得法術絕焉

原注孫盛曰夫玄覽未然逆鑒來事雖禪竈梓慎其猶病諸況術之

下此者乎吳史書達知東南當有王氣故輕舉濟江魏承漢緒受命中畿達不能豫觀兆萌而流竄吳越又不
知各術之鄙見薄於時安在其能逆觀天道而審帝王之符瑞哉昔聖王觀天地之文以畫八卦之象故蠱蠱成於蓍策變化形乎六爻是以三易雖殊卦繇理一安有迴轉一籌可以鉤深測隱意對逆占而能遂知來物

者乎流俗好異妄設神奇不幸之中仲尼所棄是以君子志其大者無所取諸臣松之以為威云君子志其大者無所取諸故評家之旨非新聲也其餘所譏則皆為非理自中原酷亂至于建安數十年間生民殆盡比至小廉皆百死之餘爾江左雖有兵革不能如中國之甚也焉知達不算其安危知禍有多少利在東南以全其身乎而責不知魏氏將興流播吳越在京房之儔猶不能自免刑戮况達但以秘術見薄在悔吝之間乎古之道術蓋非一方探賸之方豈惟六爻苟得其要則可以易而知之矣迴轉一籌胡足怪哉達之推算窮其要妙以知幽測隱何愧於古而以禪梓限之謂達為妄非篤論也謹案目錄附皇象今闕

陳訓字道元歷陽人也好祕學天文筭歷陰陽占候無不畢綜尤善風角孫皓以為奉禁都尉使占候皓政嚴

酷訓知必敗而不敢言時錢唐湖開或言天下當太平
青蓋入雒皓以問訓訓曰臣止能望氣不能達湖之開
塞退而告其友曰青蓋入雒將有與櫬銜璧之事非吉
祥也既而吳亡訓入晉拜諫議大夫俄去職還鄉及陳
敏作亂遣弟宏為歷陽太守訓謂邑人曰陳家無王氣
不久當滅宏聞將斬之訓鄉人秦璩為宏叅軍說宏曰
訓善風角可試之如不中徐斬未晚也宏攻征東叅軍
衡彥于歷陽問訓曰城中有幾千人攻之可拔不訓登

牛渚山望氣曰不過五百人然不可攻攻之必敗宏復大怒曰何有五千人攻五百人而有不得理遂攻之果為彥所敗方信訓有道術乃優遇之都水叅軍淮南周亢嘗問訓以官位訓曰君至卯年當剖符近郡酉年當有曲蓋亢曰脫如所言當相薦拔訓曰性不好官惟欲得米爾後亢果為義興太守金紫將軍時劉聰王彌寇雒陽歷城太守武瑕問訓曰國家人事何如訓曰胡賊三逼國家當敗天子野死今尚未也其後懷愍二帝果

有平陽之禍或問明年吉否訓曰揚州刺史死武昌大火上方節將亦當死至時劉陶州周訪皆卒武昌大火燒數千家時甘卓為歷陽太守訓私謂所親曰甘侯頭低而視仰名為盼刀又目有赤脉自外而入不出十年必以兵死不領兵則可以免卓果為王敦所害丞相王導多病每自憂慮以問訓訓曰公耳豎垂肩必壽亦大貴子孫當興于江東咸如其言年八十餘卒

議曰範等吳之精于術數者也陰機奇中鬼神所惡故

不敢語諸人傳諸子孫猶為造物所忌往往不得其死
謂之殺身之學人君之術在于修己用人以安百姓區
區小數不足學也孫權必欲知其訣傳其道以不得而
損薄之豈知君人之道哉陳訓官為奉禁畏皓不言知
矣哉

葛洪

謹案晉書
字稚川

丹陽句容人也祖系吳大鴻臚父悌吳

亡入晉為邵陵太守洪少學家貧樵薪以貿紙墨夜則
寫書誦習遂以儒學知名性寡欲無所愛翫不知碁局

幾道擣蒲齒名為人木訥不好榮利閉門却掃未嘗交游於餘杭山見何幼道郭文舉目擊而已各無所言時或尋書問義不遠數千里崎嶇冒涉期於必得遂究覽典籍尤好神仙導養之法從祖玄孫權時學道得仙號曰葛仙公以煉丹秘術授弟子鄭隱洪就隱學悉得其法後師事南海太守上黨鮑玄亦內學逆占將來見洪深重之以女妻洪洪傳玄業兼綜練醫術凡所著撰皆精覈是非而才章富贍太安中石冰作亂吳興太守顧

祕為義軍都督與周玘等起兵討之祕檄洪為將兵都尉攻水別帥破之遷伏波將軍永平洪不論功賞徑至雒陽求異書以廣其學洪見天下已亂欲避地南土參廣州刺史嵇含軍事及含遇害還鄉里征鎮檄命一無所就及元帝為丞相辟為掾以平賊功賜爵關內侯咸和初司徒導召補州主簿轉司徒掾遷諮議參軍于寶深相親友薦洪才堪國史選為散騎常侍領大著作洪固辭不就以年老欲鍊丹以祈遐年聞交趾出丹求為

勾漏令帝以洪資高不許洪曰非欲為榮以有丹爾帝從之洪遂將子姪俱行至廣州刺史鄧嶽留不聽去洪乃止羅浮山鍊丹嶽表補東官太守又辭不就嶽乃以洪兄子望為記室參軍在山積年著述不輟其自序曰洪體乏進趣之才偶好無為之業假令奮翅則能陵厲玄霄騁足則能追風躡景猶欲戢勁翮於鷦鷯之羣藏逸迹於跛驢之伍豈況大塊稟我以尋常之短羽造化假我以至鶩之蹇足自卜者審不能者止豈敢力蒼蠅

而慕沖天之舉策跛鼃而追飛兔之軌飾嫫母之篤陋

求媒陽之美談推沙礫之賤質索千金於和肆哉夫焦

僥之步而企及夸父之蹤

原注焦僥短人長三尺

近才所以躓礙

也要離之羸而強赴扛鼎之勢秦人所以斷筋也

原注史記

秦武王與孟說舉鼎絕膂死膂脰骨也戰國策作脉與此不同

是以望絕於榮華之塗

而志安乎窮圯之域藜藿有八珍之甘蓬萊有藻稅之

樂權貴之家雖咫尺弗從也知道之士雖艱遠必造也

考覽奇書亦既不少率多隱語難可卒解自非至精不

能尋究自非篤勤不能悉見道士弘博洽聞者寡而意斷妄說者衆至於時有好事者欲有所脩為倉卒不知所從而意之所疑又無足諮今為此書粗舉長生之理其至妙者不得宣之於翰墨蓋粗言較畧以示一隅冀悵憤之徒省之可以思過半豈謂闇塞必能窮微暢遠乎聊論其所先覺耳世儒徒知服膺周孔莫信神仙之書不但大笑之又將謗毀真正故予所著子言黃白之事名曰內篇其餘駁難通釋名曰外篇大凡內外一百一

十六篇雖不足藏諸名山且欲緘之金匱以示識者自
號抱朴子因以名書其餘所著碑誄詩賦百卷移檄章
表三十卷神仙良吏隱逸集異等傳各十卷又抄五經
史漢百家之言方技雜事三百一十卷金匱藥方一百
卷肘後要急方四卷洪博聞深洽江左絕倫又精辯玄
蹟析理入微後忽與嶽疏云當遠行尋師剋期便發嶽
得疏狼狽往別而洪坐至日中兀然若睡而卒嶽至遂
不及見時年八十一視其顏色如生體亦柔軟舉尸入

棺輕如空衣世以為尸解得仙云

謹案葛洪晉人無與三國雖以裴注之博

采亦不及洪事此入正傳于限斷為疎矣

識曰余觀洪所著抱朴子書博雅該貫精窮技術潤色之以儒學鼓吹之以文藻方士之魁傑者也其以為神仙可至專為脩鍊服餌誤天下後世深矣人配天地用萬物養生之具聖王制作六經備矣其居宮室其服絲麻其食穀麥果菜魚肉起居有時嗜欲有節不傷之而已其存沒如晝夜之常不祈生而惡死也自周之衰乃

有方士為長生不死神仙之說誘天下以欲而盡其心
於是有脩鍊服餌之術燒灼其胃腸煎熬其血氣易穀
麥以金石溷精液為鉛汞以求長生不死而徵冀為神
仙往往殺身而札瘥天昏漢晉之初猶秘其術而陰以
殺天下至洪著書昌言於世隋唐以來其術盛行世主
甘心為周穆秦皇漢武唐憲穆而下藥殺者數君

原注
唐書

憲宗服金丹多躁怒左右宦官往往獲罪有死者唐子
暴崩於中和殿穆宗初柳泌等既誅方士稍復因左右
以進上餌其金石藥疾作崩於寢殿武宗餌方士金丹
性加躁急喜怒不常六年三月帝崩宣宗餌道士藥疽

發於背而崩

王公大人焚其身而不知悟者見於載籍不啻

數十百人

原注韓文李干墓誌干以進士為鄂岳從事

年病益急乃死其法以鉛滿一鼎按中為空實以水銀蓋封四際燒為丹砂云余不知服食說自何世起殺人不可計而世慕尚之益至此其惑也在文書所記及耳相聞傳者不說今直取目見親與之游而已藥敗者六上公以為世識工部尚書歸登殿中御史李虛中刑部尚書李遜遜弟刑部侍郎建襄陽節度使工部尚書孟簡東川節度御史大夫盧坦金吾將軍李道古此其人皆有名位世所共識工部既食水銀得病自說若有燒鐵杖自顛貫其下者摧而為火射竅節以出狂痛號呼乞絕其衽席常得水銀發且止唾血十數年以斃殿中直發其背死刑部且死謂余曰我為藥誤其季建一旦無病死襄陽黜為吉州司馬余自袁州還京師襄陽乘舸

邀我於蕭洲屏人曰我得秘藥不可獨不死今遺子一器可用棗肉為丸服之別一年而病其家人至訊之曰前所服藥誤方且下之下則平矣病二歲竟卒虛大夫死時溺出血肉痛不可忍乞死及金吾以柳泌得罪食泌藥五十死海上至今未已也其禍天下後世如此之

此可以為戒者也

酷而洪乃謂世儒不知而謗已嗚呼儒不知洪邪洪不

知儒邪

贊曰神局與鎖冥探灼索揭露陰機戒之在得

